



崇禎朝記略卷三

江上遺民李遜之輯

九年丙子正月內閣溫體仁奏逮問知縣成德之母辱臣於長安門又持本聲寃於朝上命下德錦衣衛打問已於午門前杖德六十發戍初德為滋陽令耿介絕俗不善事上官偶處府廳積役府廳怒之揭於巡按禹好善開列多端誣以貪酷致被提問及到京士民俱為之訟寃長洲在閣時亦言之至是好善再疏直言德係舊輔私人久矣賴上不之罪而德母各處投揭至隨體仁輿詬厲於朝門體仁畏之乃具揭奏聞竟罹重遣至十六年起廢陞兵部王事甲申之難母子同殉節死



曹欽程者以逆案問辟繫獄將十年同案諸人俱已正法獨欽程尚存遂為獄中牢頭鄙橫無恥每縉紳入獄即需索萬端成入欽程亦如法索詐成大怒拳歐之數百一無所得而身被傷人皆快之欽程後以闖賊破京釋放即拜降賊庭從賊西去不知所終

甯夏巡撫王楫馭下少恩一日於教場點兵下操適有圍解到賞軍餉銀軍士遂紛紛求發楫不許比夜楫入城至北門內軍士攔路求索楫命鎖之衆軍遂鼓譟稱亂持刀砍楫氣絕仆地而死事在丙子正月從來邊軍多跋扈當元年甘肅兵變已戕殺巡撫畢自肅矣至是凡再見云

淮安武舉陳啟新上獨違時尚疏灑萬言其大指則極詆進士之橫縣令之貪至發憤於腐爛蕪儒欲并科目廢之專舉孝廉行漢法跪於千門奏進上方行不測之恩威遂投契上意奉旨以為敢言可嘉徑授吏科給事中吏部不能執奏舉朝無敢訟言惟劉宗周於條奏疏末及之言啟新言有大而近誇情似要而有挾未可據定其品一言投契立置清華雖稱一時盛事將如名器可惜何後啟新官諫垣二三年庸庸隨時未有非常建白卒以敗類蒙譏得罪真覺名器可惜也

時有候選庫大使程品疏斥啟新之虛誕欲廢祖制科目之制是絕孔孟君臣之脈上怒着刑部提問擬罪其人雖未必



端品然此疏則足愧舉朝之容默者矣

命兩京三品以上於進士舉人貢監中舉堪任知府一員五品以下及翰林科道在外兩司知府於貢監吏民中舉堪任知州知縣一員送吏部除授部中先舉在京各官所舉共二百餘員開列上呈命量才選用初旨命令即授州縣正官遂大半以營謀得之及部中類考又復以賄為高下至有考授丞簿者諸人始各廢然於是有志者俱不屑就寃之亦未能得一人也

劉宗周以特召至拜官工部右侍郎即上痛憤時艱疏略曰朝廷有積輕士大夫之心自此耳目參於近侍腹心寄于武夫治術尚以刑名政體歸之叢脞殿衛司訊訪而告訐之風熾詔獄

及士紳而堂簾之等夷人救過不給而欺罔轉甚事仰承獨斷而諂佞日長三尺法不申於司寇而犯者日衆詔旨雜治五刑而好生之德意泯刀筆治絲綸而王言褻誅求及瑣屑而政體傷參罰及錢糧而官逾貪吏逾橫賦逾逋嚴刑與重斂交困而盜賊滋起總理任而臣下之功能薄監紀遣而封疆之責任輕督撫無權而將日懦武弁廢法而兵日驕而朝廷之威令并窮於督撫朝廷勒限盡賊而行間日殺良以報級以幸無罪求治愈殷紛更四出致市井雜流咸得操訛抵隙以希進用皇上不過始於一念之矯而積漸之勢釀為厲階幾於莫可收拾今日轉亂為治之機斷可識矣奉旨大臣論事當體國度時不



效小臣歸過朝廷為名高已閣臣以馬價空匱議捐助宗周獨言不敢懷利以事君并請禁天下之言利者得旨切責遂引疾罷歸至天津知北兵自昌平深入憤甚復上身切時艱疏略曰往已已之變有小人起而修門戶之怨自此小人進而君子退中官用事而外庭浸疎人、解體事、規卸文法日繁欺罔轉甚朝政日隳邊防日壞以有今日之禍實已已以來釀成之也且以張鳳翼之溺職中樞而予之專政何以服王洽之死丁魁楚等之失事而予之戴罪何以服劉策之死諸鎮勤王爭先入衛者幾何人不聞以透留詰責何以服耿如杞之死今幸以二州八縣生靈結一飽颶之局廷臣若可幸無罪者又何以謝韓

曠張鳳翔李邦華諸人之或戍或去豈昔之為異已驅除者今不難以同己互相容與耶且皇上惡私交而臣下多以告訐進錄清節而臣下多以曲謹容崇勵精而臣下奔走承順以為恭尚綜覈而臣下瑣屑吹求以示察凡此似忠似信之類無往不出於身家利祿將聚天下之小人立于朝皇上亦有所不覺矣又言小人與中官每相比以相為引重而君子獨岍然有以自異故古有用小人之君子終無黨比中官之君子未又及時政最乖者數事以誰生厲階至今為梗責備首輔體仁謂其大奸似忠大佞似信且引唐德宗之不覺盧杞奸邪為規奉旨責以比私亂政顛倒是非草職為民已又上書體仁規其勿蹈江陵



分宜之覆轍體仁不省

劉公前後立朝皆不滿一年而諫草甚多皆鑿名論纏綿懇惻不減賈長沙陸敬輿也已盡選入名臣奏疏中但擇其切關時事者錄一二於此云

大學士錢士升疏進四箴一曰寬以御衆如天之覆賢愚并包功過在宥大絃毋急六轡毋驟不競不絀世躋仁壽魏蕩大哉吾后一曰簡以臨下若網若綱要領獨挈條目畢張無為守正垂拱明堂執要則逸好詳則荒程書衡石徒蔽章光一曰虛以宅心如鑑斯空妍媸好醜畢獻形容寂然不動感而遂通以意索照億逆填胸隣鉄市虎載鬼張弓一曰平以出政如衡

斯準輕重毋畸裒益必允舜貴執中孔戒已甚救弊矯偏參調詳審畏卒佈始罔或不凜時上已不悅未幾遂以論駁武生李璉疏議搜括富戶事去位

自武舉陳啟新上疏邀特恩一時長安遊棍章滿公車至有徑請名對者武生李璉一疏至欲江南縉紳富戶報名輸官行首實籍沒之法疏下閣票嘉善惡之遂擬刑部提問以進御批改票烏程曰上方欲通言路當以所擬太重耳遂改擬姑不究嘉善曰此亂本也當以去就爭之即具疏言此衰世亂政是使亡命無賴之徒相率與富家為難不驅天下之民胥而為流寇不止迄屏絕橫議毋使小人因陳啟新之進以言利窺朝廷疏上



而璉疏已批下法司提問矣。是疏則批云改票原欲申飭通政何相疑至此。即欲沽名。前疏已足致之。遂請告辭去其官而用其言。一疏之有造於生民者大矣。

先是有經歷吳鯤化上疏論雲南巡撫錢士晉貪肆烏程。即擬嚴旨行巡按究問。回奏士晉係嘉善嫡弟。蓋欲借其弟以逐兄。皆烏程之機械也。旨下而士晉報病故事。乃得解嘉善。卒以是去。

錢已去位。御史詹爾選先有疏論陳啟新之用。責備輔臣冢宰。宰不能盡言執爭。至是復疏言。大臣所以不肯言者。以不肯去耳。今士升肯言矣。肯去矣。以去就悟明主。以氣節風百僚。皇上

不即嘉許而疑其要譽耶。且天下之疑上者不少矣。將卒驕懦。日甚。聖德恩禮過渥。則疑過於右武。穿札與操觚並課。人見絀德而齊力。則疑緩于敷文。免覲說行。或疑朝宗大義。不值數萬路費之金錢。駁問日煩。或疑明啟之刑書。不當幾番加等之紛亂。其君子憂驅策之無當。小人懼陷累之多門。明知一切苟且之政。或拊心愧恨。或對衆唏噓。種。隱情有難殫述。上怒甚。命錦衣衛拿問。特御門召對。面詰問如何。是苟且。詹曰。即捐助一事。也是苟且。侃。數百抗對無屈。且曰。臣死不足惜。皇上幸幸聽臣言。固可為今日之用。即不聽臣言。亦可留為他日之思。中璉在旁亦嘖。嘆服。上益怒。命繫朝房候旨。內閣揭救。翌日



旨下言本當重處念輔臣申救姑着放了都察院議處初止議  
罰俸以議語涉誇并處主稿御史張三謨乃改議為民  
上以邊警仍分命太監盧維甯等總監通津臨德等處兵馬糧  
餉御史金光宸疏請罷遣上大怒于八月十六日召對廷臣是  
日下午恰值風雨驟至閣臣部院侍立雨中至以袖障雨上召  
兵工各部堂入厲聲云而今要練兵買馬製器械諸臣唯云上  
云平時都說口子是好的而今卻從口子入了平時都說有兵  
馬準備而今卻沒有這是怎麼上聲色俱厲風雨聲亦復雜沓  
久之獨召金來前上云你疏是甚麼主意你們科道官到這時  
候並不說何利當興何害當除還說這套話光宸云皇上因文

武官員無一定心任事所以有這番委任但這些事體別有委  
任文武官員一發好却担了上厲聲云事到如今你們文武官  
員可羞可羞金云臣巡按河南時見皇上罷撤內遣以為是聖  
明第一美政語未完上即云不要是這等說連說數聲金又將  
文武官員話頭申說一遍上云本該重處以後再有這樣的定  
要拿問徐云該部議處諸臣仍賜茶菓而退  
以張元佐為兵部右侍郎鎮守昌平同時遣內臣提督天壽山  
者皆即日往上語閣臣曰內臣即日就道而侍郎三日未出何  
怪朕之用內臣耶閣臣默然是年昌平陷乃內臣納假兵而起  
為內應者



命調各鎮兵入援總兵劉澤清至河間擁衆不前疏言東撫李  
懋芳格標兵不發上怒下部議懋芳草革職其寔標兵三千而劉  
兵萬餘不相涉也自此以後總兵非復督撫可制而澤清更為  
跋扈云至壬午之警王永吉為東撫陷至七十餘城而以兵僅  
三千為上所原反得陞薊遼總督不知三千兵從來如此當時  
撫臣所值有幸有不幸也

本兵張鳳翼自請以身當敵督援兵出師而以舊本兵梁廷棟  
為總督梁由南至張自京出北兵至雄縣而返徧蹂畿輔破數  
十城二人俱尾其後而已北兵將出沿途刮樹大書各官免送  
四字二人度敵退後且罹重罪因日服大黃藥取瀉求死北兵

以八月十九日出口張以九月初一日卒又數日梁亦卒後下  
刑部議罪梁議斬張免議以烏程之庇故時謂張死亦不幸矣  
北兵入至天壽山將諸陵寢殿拆毀兵退後撫按奏稱忽有怪  
風從東北起祖寢門扇海馬獸頭神路樹枝悉行刮損有旨着  
估價修理上下相蒙不復究竟而閣臣反以事平叙功加恩時  
新拜三參句容孔貞運江夏賀逢聖南海黃士俊俱加太子太  
保

邊警時適當鄉試屆期遂停不舉至事平後改十月初二日為

初場

日揭曉

誠意伯劉孔昭疏論倪元璐紊制當黜借明綸以媚婢嫡妻陳



氏現存而王氏居然冒封許重熙偽士非祖敢居下以訕上寔錄未成而五陵注略先刊行世蓋溫體仁乘文何二相既去以倪為二相臭味必欲擠去之而後快言路部僚莫有應者因以京營總督缺誘劉孔昭令之出疏奉旨下部看議倪前妻陳氏有故而去再娶王氏皆名家女非以妾冒封竟坐冠帶閑住議許除名禁錮不足明罰宜下法司窮治體仁擬旨三上不允徑批許重熙着斥革後孔昭不得京營缺特復操江操缺以償之孔昭前此已參戶尚候恂以媚溫矣

時上銳意取法世宗命近侍遍買坊間刻本如見聞錄等項適注略初刻亦買進登御覽中有誠意伯襲爵事頗致訛貶上覽而賞之孔昭聞而懼遂因參倪疏而并及故閣部俱議窮究上終不允云當時謂倪為今之韓愈許乃得與之比類同毀耶人之視許已不輕矣許後年將大耄猶留心史事下榻荒齋者三年蠅頭小楷手不絕書惜未竟其事而齋志以沒也

黃景昉主北闈試以馬之驥為解元下第者吹索字句投揭陳啟新出疏參之景昉辨疏言吏科無衡文之責啟新非能文之人上以御筆塗吏科句意可知矣部議竟以數字不雅議罰四科景昉降級其逢迎啟新如此

方流賊蹂躪中原官兵攻之總兵曹文詔斬獲獨多然以勇而



原評必漢殺賊有功  
其去位也亦當論  
其特傍題輕按耳  
見後冠紀略

驕為賊所陷沒陞盧象昇總理五省孫傳廷巡撫陝西與三邊  
總督洪承疇協力勦賊孫久居邊疆習行間事盧身先士卒忠  
勇有為率關外兵一再破賊而孫洪亦時以捷聞時闖王已  
誅蝎子塊已為盧追逐入秦河南稍甯自羣盜擾河南北者三  
年夾河千里雞犬無聲賊既無可掠盧又合大軍于中原羅而  
威之寇已稍衰及以邊警調各兵入援事平即改用盧為宣大  
總督洪為薊遼總督而寇復蔓延矣老回等盤踞鄭襄間休  
糧息馬秋高足食乃以全軍合曹操闖塌天諸賊兵二十萬沿  
江長驅而下靳黃六合懷甯望江浦所在告警烽火且及儀  
揚已自尉氏至登封至汝南復入河南豫撫陳必謙輕撫被誘

幾以身殉為按臣楊繩武糾劾解任削職以王家禎代之兼總  
理川湖山陝督勦事務後以亦無功而罷

邊將祖寬勇敢善戰滁州五里橋之戰殺賊近萬人總理盧疑  
多平民雜其中有無辜之嘆祖大怒盧以異語謝亦不能釋然  
也後洪調祖入陝勦賊祖擒闖賊高迎祥并其妻以獻其部下  
李自成收其餘衆復自稱闖王闖部下有張獻忠者榆林人初  
號黃虎至是自稱八大王而天下事自此竟盡于二賊矣

山西巡按張孫振參學臣袁繼咸婪肆贓款有旨拿解來京究  
問兼責撫臣吳甡何以薦劾互異吳回奏言繼咸清公自矢學  
行兼優舉荐自出公論繼咸到京因疏訐按臣之徇私囑托事



事有據三晉士民亦羣為哀訟寃上察其非誣命復繼咸官逮孫振下獄問遣後繼咸官至江廣總督國亡被獲全節而死可謂不負上恩矣孫振以南渡時諂附馬阮復官御史謀翻逆案誅鋤正人與袁弘勳同為一時之巨憝云

左都唐世濟疏薦霍維華邊才戶科宋學顯糾之奉旨逆案中人不許舉用屢有嚴旨唐世濟乃敢借邊才薦舉大臣如此欺蒙小臣如何底止着革了職刑部提問吏部謝陞因奏憲臣謬薦匪人臣在病榻失於查參蓋二人原同心阿附首揆荐維華原出體仁意使世濟先言嘗試陞偽為不知其狡如此及奉嚴旨問罪遣戍體仁亦憚上威不能為之地謝亦以此失上眷去

位矣未幾福建巡按應喜臣薦地方人才中及逆案中之周昌晉因大理寺副孫杰疏劾亦命逮喜臣問遣刑部王都又劾刑侍郎章光岳在通政時請逆案中有枉者辨疏許其封進御史水佳胤有疏請吏部將逆案中有不平者明告二人皆當究處部覆光岳引退佳胤以別事處免議都又劾吏尚田唯嘉當王永光借題邊才唯嘉即薦楊維垣賈繼春二人光岳薦呂純如霍維華傅榘徐楊先虞廷陞葉天陞六人夫世濟喜臣薦一人而拿問薦二人六人者宜何居時田方新經簡任眷遇正切召對出疏示之諭不必置辨

蘇松學臣倪元珙回奏據道臣馮元颺知州周仲璉申文大約



言復社之士文行相先並無把持武斷之事陸文聲作奸犯科  
憲檄拘提逋逃在外懷恨入都借復社發難耳有旨復社結黨  
恣行所關世道人心不小倪元珙狗州道申文扶同誇詡都着  
議處元珙等各降調是時復社盟主首推二張張溥張采銳意  
矯俗結納聲氣間有依附借名者未免輿論稍有異同烏程當  
國因惡諸正人欲為一網清流計正思借題生事文聲本一無  
賴見陳啟新之拔用遂效尤建言希圖進身故借復社為題迎  
合政府而蘇州推官周之夔業以漕事罷官恨及二張亦疏許  
復社生徒妄立四配十哲名目濁亂一時皆溥采為之倡政府  
徇其意皆票旨嚴究大開告訐之門同時又有嘗熟奸民張漢

孺奏詰錢瞿二宦事

十年丁丑正月

張漢儒者嘗熟邑民奔走於諸大家為門幹後又投充糧衙書  
手以事犯革逐并不容于鄉里不得已棄家入京遇有同邑陳  
履謙亦以事犯在京出入縉紳之門因相謀議欲訐奏豫撫陳  
必謙暨鄉紳某人以報怨而錢謙益瞿式耜二人為首輔深仇  
遂州成奏疏開列多款先於朝房呈之體仁體仁首肯顧其注  
毒在錢瞿且恐人多則啟上疑因去陳與瞿而止參二人投通  
政上之體仁竟擬嚴旨着撫按提解且以不行糾參責令回話  
既下刑部究問贓款又發撫按詳鞫屢問屢駁株連不已虞山  
因營謀求解於曹璫曹故王安名下也以所作安碑文為証曹



原評周應璧由揭密  
首發時揭密有疏改  
溫故及

覽之泣下，乃盡力為之營救。而陳履謙復獻詭誕出首之計，先具一匿名揭，有款曹揭溫等語。隨令王藩出首云：虞山賈四萬金，托周應璧求款於曹。烏程即具密揭入奏，上以其揭示曹，上懼甚，自請窮究其事。先是衛帥董琨逼定招，以匿揭為根據。以王藩為確証，應璧堅執不認。董琨逼勒成招，事頗昭著。曹璫奉旨嚴究，大加搜訪，備悉履謙父子奸狀，擒到廠衛訊問。招出漢孺草疏，王藩出首，併伊父子捏造款曹擒陳和溫六字，又改和為擊等情。歷有據獄上，張陳王俱廷杖一百，立枷死。烏程亦放歸，蓋由曹盡發其奸。知漢儒之疏，匿名之揭，王藩之首，皆其主謀。前此總憲薦霍謀翻逆案，尤其指使也。烏程每興大獄，必

稱病以聚謀，定而後出。是時修理湖州會館，方擇日移居。疏上，邀宣諭，即日出矣。淄川已稟留御筆書放他去，閣票有人夫祿米等項，御筆抹去。疏下出不意，方食筋失，人心稱快。錢瞿旋各坐贖徒去。

烏程既去，又復枚卜。綿竹劉宇亮進賢傳冠陞禮部尚書，韓城

薛國觀原左僉都御史陞禮部侍郎，各兼東閣大學士。旨云：着與輔臣

至發，協同辦事。不稱首輔，有與至發密者，勸且稱病。至發云：無奈賤體頗康，直至半年後一日，偶有宣賜，稱首臣。至發遂即日廷謝，編修吳偉業疏言：願至發以體仁為鑒，體仁學無經術，則當練達朝章，體仁性習諂諛，則當矢志光明。體仁狎暱小人，則



則當嚴杜諭訛體仁護持逆黨則當力褒忠孝母效其泄沓偷容母似其游飾詐近日辨揭盛稱體仁之美曰孤執曰不欺夫體仁有唐世濟吳振纓之徒參贊密謀有陳履謙陸文聲之徒驅除異己何謂孤庇樞貳則總理可不設而事敗乃設何謂執必因私踵陋盡襲前人所為將公忠正直之風何以復見也南祭酒許士柔以撰原任左都高攀龍贈官誥命為輔臣張至發糾其違式命降二級調用故事兩制專屬詞臣而贈官誥文則誥勅房中書據為職掌大臣子弟欲表章先德以中書撰文未盡善也每請詞林名公為之崇禎初元褒贈死難諸家誥文盡出詞林手獨高忠憲誥文雖作而以軸缺未領至是閱八年

矣其家請補給仍錄許原撰文以進時已奉旨申飭不許用駢語煩文中書官遂抉摘其制語獻之中堂至發以許為倪黃之同年友方為時忌正欲引繩批根特揭參之遂奉嚴旨忠憲誥命亦遲回不敢請矣大司寇鄭三俊給諫何楷各疏言上自處撰文違式者耳非謂高攀龍之清忠勁節有煩擬議也始得旨另撰文補給

東廠緝獲福建泉州府吏員許馨來京打點為興泉道曾櫻謀陞浙江按察司案文選之下當缺考字據其書法則萬金錄來方燁也央考功葛主事文選來郎中說分上有元寶八錠奉旨各犯下鎮撫司嚴究曾櫻革職逮問曾歷官清執忽有此事眾共疑嘆御史葉初春為訟言之撫按亦為之稱寃漳潮



總兵鄭芝龍疏櫻廉明公正龍感其德代為之營陞其實與櫻無干願以官贖罪上已鑒悉准令櫻復官起用芝龍圖功自贖鄭芝龍福建南安人其父故泉州府吏也曾受知府蔡善繼恩芝龍聚眾雄行海中時浙有李魁奇廣有劉香與芝龍為三蔡再起為兵巡道以巡撫熊文燦命招撫之芝龍以蔡故屈意投降題授副總兵鎮守漳泉惠潮地方魁奇為香為誘犯浙江及南直芝龍用計擒斬之香亦相繼為龍擊敗走死

特起楊嗣昌為兵部尚書時方守制疏辭不允令奪情視事舉熊文燦為四省總制專勦流賊文燦撫閩以招鄭芝龍成功至是亦主議撫張獻忠等遂詐降投誠文燦信之授之以官獻忠

跋扈愈甚刦殺自如撫議卒敗文燦遂以庚辰年伏法死

河南巡按張任學疏云臣書生也於龍威丈人之秘雖無所窺而以二十五年之學問為皇上練此勦亂之經綸以答祖宗養士之報誠自信於中矣皇上不以臣為不肖乞下部院集議將臣改為總兵官行當四征寇虜雪國恥而復生民之仇云云奉旨下吏兵二部都察院集議以為御史改總兵寔從來未有之事請仍以監軍御史兼署總兵銜為便聖旨以任學忠勇可嘉准改授署都督僉事充河南總兵官

按張係乙丑科進士四川保甯人由知縣考選御史先巡鹽浙直再差巡按河南自謂從戎可謂慷慨直前之丈夫或者



謂其本欲謀得巡撫故請從戎不知此時中州撫缺人皆視為畏途竟可不謀而得何必改武銜然後自改任後仍未見有殺賊奇功竟以失事逮問亦見當日任事之難矣

上以任丘清苑涑水遷安大城定興通州各有司不法命逮問責撫按不効為溺職先是有固安知縣秦士奇撫按遣官奉旨搜私宅得銀七百兩坐贓論戍大同僉事劉彝鼎因撫臣薦疏批旨云彝鼎貪污狼籍着會同監視參來重處遂逮問遣戍蓋皆由中璫毀之也自此外任官皆不得不以調停大璫為事矣先是丁丑年又有潘益達白慧光皆近畿縣令中旨命御史參奏提問

十一年戊寅二月初七日皇太子出閣講學閣中先期題侍班官四人姜逢元姚明恭王鐸屈可伸講讀六人方逢年項煜劉理順吳偉業楊廷麟林增志校書二人楊士聰胡守恆侍書二人中書朱國詔黃應恩舊制日講官東宮講官無相兼者恐上與東宮同日御講筵不能兼也且應恩既充正字又充侍書皆以至發不諳衙門規例故惟應恩攘之耳項煜楊廷麟各上疏願讓黃道周奉旨不得矯讓至發揭辨云道周清品意見少偏如近疏有不如鄭鄭語夫杖母何如人而自謂不如是可為元良輔導乎時鄂獄尚未成草此揭者黃應恩也給事馮元飈疏言道周至清無徒數忤執政項楊二臣退然自下為大臣者正



宜嘉嘆而至發一揭大不快其言并遷怒道周何也至發出揭  
辨又上世風宜挽疏累數百言內云道周出山援愛母之心借  
一言以周旋鄭鄭豈曰非孝但不宜以朝廷是非之公為一己  
環草之私又云有一二人焉建壇坫執牛耳自命于人者吾將  
主持世風已而自命者與之附者入主出奴了不得其何緣何  
故未又請禁投刺往來自今士大夫門盡可羅席盡可塵夫人  
而能為廉也夫人而能為讓也而推重于溫體仁頌其孤執不  
欺竊願學之云、或言此疏亦出應恩代草者

本兵楊嗣昌之父鶴以三邊總督逮問遣戍至是甯夏叙功復  
官給誥命舊例贈卹誥命中書撰文章者為之應恩為楊鶴撰

文極力洗發進呈上塗抹發下令查職名議處淄川欲上公揭  
申救孔句容曰去年許士柔事正與此同彼時未申救今奈何  
救之淄川憤曰難道閣中少得此人我自救之連上三揭上不  
允御批云撰文自註職名新經申飭應恩供役閣中首先違玩  
人臣功罪各不相掩蒙冤等語視當日之處分為何如應恩着  
革職為民嗣昌亦上疏救不聽既而大理寺副曹筌疏參首輔  
并應恩納賄諸事件奉旨首輔素矢清慎何得牽詆應恩刑部  
提問

鄭三俊為刑部尚書適當科臣宋之普以馬豆事參戶部尚書  
侯恂下獄先有讒言謂三俊與侯恂皆東林契友必且屈法徇



私上入其言。獄上果多為恂卸罪。上大怒。并三俊亦下獄。宣大總督盧象昇先具疏稱寃。盧昔為鄭司屬。素服其清公者也。繼盧者不下十餘疏。應天府丞徐石麒疏尤剴切。閣票回話發改。閣票為民。又發改閣票提問。御批云。可將三俊罪狀一講明。不必更處奏事官。閣中擬旨進。即批出。

時當考選。行取官既集。推敲詞林臺省。雖據官評。而亦別有營私者。陳啟新疏論其事。奉旨據實回奏。又旨下吏部。將訪冊進覽。特處圈多濫多狗者。卿貳中姜逢元。王業浩。閻佳。科道中傅元初。六人。閑住。孫晉三人。降調。劉含輝等十一人。降級。照舊啟新回奏。指涇縣尹民興。江都顏胤紹。及同鄉預定之陸自嶽。部

覆各降處。田唯嘉乃請先推部屬。所推二十二人。輿論譁然。與推者各懷不平。獨成勇恬然無怨色。不數日。辭朝赴南京吏部任去矣。

二月十一日。御經筵畢。召詹翰諸講臣。顧錫疇等二十餘人。問保舉攷選二者孰為得人。諸臣各以大意虛對。黃景昉獨以鄭三俊下獄及朱天麟成勇不得與攷選對。上細訊良久。諭以三俊蒙狗。徒清亦不能濟事。至成朱二人。則李建泰以下。同聲為之稱屈。上命起序立。有言者獨奏。諸臣各陳所見。上曰。言須可行。如先年講官姚希孟。欲將漕米改折一年。這個行得行。不得。楊廷麟奏。自溫體仁之薦唐世濟。王應熊之荐王維章。今



二臣皆敗而體仁應熊無恙是連坐之法先不行于大臣欲求保舉之效得乎上為色動久之無所言項煜乃奏成勇不得攷選以任濬為閣臣至發兒女親家前任濬列第二後以有議以成勇易之閣臣不欲勇獨得攷選若得則俱得失則俱失云尔上曰誰沒有兒女親家也不在此至發奏請勅撫按勘臣與濬結親或現在或已亡有一於此則治臣罪上諭以不必與辨對畢出次日黃道周余煌黃景昉楊士聰各有疏而田惟嘉亦有疏直攻楊廷麟云成勇輩各為同鄉所引臣一旦推之部屬安得不觸諸臣之怒廷麟以推部之涂必弘係江西人特借成勇天麟為口實耳至聶明楷係伊同鄉萬谷春保舉臣且參革并

谷春降處是以恨臣以保舉攷選為不公也奉旨接引主持有何憑據且原傳黃景昉何訛為楊廷麟還着明白具奏十六日御日講面諭景昉昨原切責鄭三俊豈是矜亮又諭余煌昨諭有姚希孟全折漕糧一年之語煌對行不得此數語如何不載又越日御門畢諭百官數百言內言鄭三俊一案屯豆墻穴情弊顯然有何可疑而欺罔推諉巧為彌縫屢奉批駁亂法愈甚但念別無贓賄姑着回家聽擬蓋聖明本樂受言特不欲恩歸於下耳

姚宗典曰凡日講一章附論時事一段猶臺省之條陳也先文毅進講在乙巳庚午間時入夏始允糧阻凍閘河須待來



春始得交納京倉較之祖制十二月兌糧二月開幫五六月到京交納七八月回空何啻天淵偶引及之或不妨改折一年以通其窮亦作商量語耳若使斯言果拂聖意亦必面賜譙讓如余煌矣乃歷庚午至壬申值講又三年蒙恩如一日何既貫之于生前反繩之于身後蓋時當請卹忭先臣者寔多以例無可駁乃摘其講讀之謬駁之冀以此斥先臣也

王維章所至以貪墨著備兵西甯以剋削致軍變應熊力護之舉為四川巡撫至公然形之揭奏云維章臣畏友益友也等語及任四川復以賄敗時無敢言之者

楊士聰回奏疏下又參及史堃巡按淮揚署巡鹽事侵匿課銀二十一萬有旨着回話堃奏臣孤立寡援屢奏奸惡向年文震孟姚希孟為詞臣之雄死者死矣震孟借虛名以入閣入閣便行私去後復草疏稿募成德代上臣曾有綸扉之線索一斷議論之風雨寂然二語故士聰借考選事硬以線索二字誣陷臣也士聰復上聖主神明燭弊疏列惟嘉納賄事欵奉旨提其家人下錦衣衛究問惟嘉旋以此去已又逮其子敬宗下獄同家人田登第等俱問邊衛充軍仍追贓充餉

南科張焜芳復疏參史堃巡監贓私狼籍等事御批云史堃堃弊多端比匿攫利大干法紀與汪機俱革職并吏睢承吾俱拿解來京究問堃以十月十二日得報隨即赴京潛入薛國觀寓



謀定乃投獄上疏辨謂昔年以參劉鴻訓錢龍錫為朋黨構陷并及楊士聰馮元飈諸人又言焜芳為中書炳芳之兄向來旨意洩露皆炳芳為之疏下閣擬票上發改再三最後擬楊馮俱革職焜芳提問上不許御批云不欲牽累多人乃票焜芳革職候訊止提書吏余伯和問此疏寔出黃應恩構造欲設謀相陷也望奉旨行查後巡監太監楊顯名回奏為之彌縫惟于交際六萬兩則云臣不能為之諱以故莖久稽獄中未幾邊警至此案遂不結莖竟憤死而事始釋

張至發因曹荃疏參連疏請勘奉旨卿連疏請勘心跡愈昭何足與辨云：張乃上疏求罷云臣佐理無能當去諧世無術當

當去竊位妨賢當去一去而揆地清羣構息朝議不至紛紜天憲不至屑越媿：百言終篇無一病字昔所云賤體頗康者於此疏見之奉旨有回籍調理語時人傳笑以為遵旨患病云然以首臣去位成昭然例而百金之賞半裁行人之送復罷揆席漸輕往規又一變矣張去而孔為首至六月中亦即放歸票旨亦同僅賜路費五十金彩段二表裡而已

四月十二日上御經筵畢召對六部問邊事本兵楊嗣昌奏有善戰者服上刑等語上諭曰此是孟子言六國兵爭事今大司馬彰九伐之威當明春秋大一統之義奈何云：隨戒以今後勿復爾時上聲色俱厲又言楚撫余應桂用將官事嗣昌言應



應桂任御史時曾有疏參臣父臣今不敢以私心駁其所用之人先國家之急而後私仇也未幾嗣昌入閣應桂就逮其轉移甚秘人不得而測矣

二十八日上御中左門召候改諸臣親賜策問勦寇需兵養兵需餉屯鹽採鑄難取近效搜括加派民力已竭將何策以處此又口逆抵邊不犯而退是何狡謀各悉心以意見條對欽定取曾就義朱天麟等五員為編修張縉彥汪偉等五員為簡討王調鼎熊維典等一十二員為給事中李嗣京等二十六員為御史闔嗣科葉樹林聲蘭友詹兆恆為南道御史其餘並授各部主事時沈迅張若麒但授刑部蘇壯已陞同知成勇陞南吏部

原評既即史多向必  
南耶

先出京不與考旋以涂必弘言拔成勇為南御史後以論楊嗣昌奪情入閣革職建問越數日上又傳諭吏部將曾就義等條陳擇可行者各酌議具覆曾就義江西人作縣頗著清名對策中言百姓之苦皆由吏之不良使守吏盡廉即稍從加派以濟軍需未為不可上喜其說遂擢第一入詞林未幾即有練餉勦餉之加

五月火星示變上於宮中齋沐祈禱青服減膳并諭各衙門素服修省樞臣楊嗣昌時方倡款議遂借兵變援引前代事疏奏云科臣何楷疏駁之云嗣昌引建武款塞故事欲借以伸市賞之說也引元和宣慰故事欲借以伸招撫之說也引太平興



國連年兵敗故事欲借以伸不敢用兵之說也其附會誠巧至永平二年一條所述皇后馬氏等語更不知其意所指斥何在且前言后妃後言陰教一篇之中三致意焉是何為者耶得旨不必深求。是時傳田貴妃與中宮不相能上亦久不見中宮故嗣昌疏中隱伏挑激語為何疏奏破嗣昌遂有辨疏其詞一甚危而于市賞招撫之說絕不一及蓋前召對善戰上刑之說其機括已陰轉矣說者謂楊之大用寔借徑于田貴妃以後有悼靈王事嗣昌疏請持誦華嚴經時方在楚中督師僅隔旬日而疏至益信其交結有自云。

六月十八日召府部卿寺院官集中極殿考閱員親命題云天

象頻仍今年為災甚烈金星晝現已逾五旬四月大雪凍斃人畜朝廷腹心耳目寄托臣工有司舉劾囂尤易起枉直難分寇尚未滅勦局難更□生心邊餉久欠民貧既甚正供尤難侵剝旁出如火益熱至操守清謹者又多自傲遂非須處置得宜禁戢有法卿等忠能體國才足濟時其悉心條對先因會推三次俱不愜上意至是拔兵部尚書楊嗣昌戶部尚書程國祥禮部侍郎方逢年工部侍郎蔡國用大理少卿范復粹俱入閣辦事嗣昌仍帶管兵部事尚在制中也當日與對者三十餘人天方大雨對畢命題已近一鼓多草了事蓋上意已定特以考為名所最注意者獨嗣昌程則以房號蔡則以牙石二事得上



心范與方不過其攜帶者耳。

房號者借合京賃居一季之租及天下會館住者亦出修理若干初謂可得五十萬其後戚畹勳臣巨璫驟從隱匿所得僅十三萬而已牙石者崇文宣武兩大街列之於中以備駕出而除道者時培修外羅城不及取石蔡建議用此然用力艱而工費浩所得不償失也二臣之受知止以此

宣大總督盧象昇疏報丁憂上命料理候代員缺該部速推有不拘在籍守制之旨因推陳新甲往代時新甲亦在制中嗣昌欲援以自解也于是詹事黃道周連上三疏其一言天下無無父之子亦無不子之臣衛開方不省其親管仲至比之緹狗李

定不丁繼母憂宋世共指為人梟今遂有不持兩服坐司馬堂如楊嗣昌者自有嗣昌而海內無行蒙垢貽禍其親者皆擲塊投杖思攘節鉞之柄今盧象昇搥心泣血以俟奔喪又忽有併推在籍守制之旨夫使守制者可推則是聞喪者可以不去也聞喪者可以不去則是為子者可以不父為臣者可以不忠也夫人遺其親必不利其君壞於家必不成於國嗣昌在事張網溢地之談歎市樂天之說才智畢覩矣更起一不祥之人予之表裏指鼻指鼻說夢捕風猶狼狽之獸倚肩並走亦何益於負重乎其二疏言頃會推陳新甲聞其丁憂猶未終制而又聞其走邪徑托捷足天下即甚無才未宜借及此也凡論人才



其所難則知其所易。批龍鱗之難。於履虎尾。冒斧鑕之難。於冒鋒鏑。今諸負氣節敢直言者。半棄不錄。欲使諸軟美容悅者。叩頭折枝。以建非常之功。豈可得乎。古亦多有忠臣孝子。無濟匡攘之用者。決未有不忠不孝而可進於功名之門者也。天下即無人。臣願解清華以執鎖鑰。何必使被林負塗者。被不祥以玷王化哉。其三論遼撫方一藻。引隆慶通市故事。今日情形之不同者有五。事之不同者亦有五。即款矣。成矣。以視甯錦。遵薊宣大之師。何處可撤者。而謂款口之後可撤兵以討寇乎。因又言兵之不可撤者有十。乃諸臣共為款局。陰設不得不款之情。恫疑聖衷。陽設不得不款之形。搖惑衆志。遵撫既無成謀。

而內受筭於樞臣。樞臣又無成謀。又外受筭於遼帥。三窟分營。鬼技千出。不幸而成。則逃青於朝夕之間。貽釁於三年之後。掠蟒玉以賒膏斧。幸而不成。則委過朝端。謬稱築舍。安受禍敗。以自為是。豈臣子所為乎。是時內外合謀。已陰遣瞎者周元忠往來商此事矣。惟此一疏。直盡斥之。

七月初五日。上召對廷臣於平臺。先召吏部尚書商周祚。侍郎董羽宸。責以會推閣臣多濫。狗次召兵部署侍郎許世蓋。諭以備邊要多備儲糧。再次召兵部楊嗣昌。問邊報各路情形。嗣昌對此時或無大舉。又問流賊情形。嗣昌對洪承疇用兵久漸有成效。孫傳庭亦有才。用兵動支屯課。不待勦餉。尤為難得。次召



刑部尚書劉之鳳侍郎王命璿諭以刑獄之事只是情法理虛公慎又諭獄情宜通保候各犯宜速審結次召工部尚書劉遵憲侍郎李覺斯諭以南城等工宜速完次召都察院左都鍾炆僉都徐燠諭以考核諸御史宜嚴曾頒憲綱未見遵行次召少詹事黃道周上曰朕幼而失學長而無聞時從經筵中畧知一二無所為而為之謂之天理有所為而為之謂之人欲爾三疏適當枚卜不用之時可謂無所為乎道周奏天人只是義利之辨臣三疏皆是天下國家綱常名教不曾為一己之私所以自信初無所為上曰前月二十八日推陳新甲何能當日成疏且說阨於時會何也道周奏因同鄉御史林蘭友科臣何

楷皆有疏恐涉嫌疑上曰今遂無嫌疑乎道周奏天下綱常邊疆大計失今不言後將無及上曰清原是美德但不可傲物遂非如伯夷是聖人之清若小廉曲謹止叫廉不叫清道周奏陳文子不能強諫大節不可觀夫子說他清而未仁夷齊大節可觀所以說他是仁上曰你說仁智勇就是清任和亦多牽強道周將仁智勇誠明之義辨說一番因言綱常名教禮義廉恥皆根本上事如無根本豈做得事業奏未畢輔臣嗣昌出班跪奏道周論臣止為奪情起復原非常理臣曾具疏再辭若綱常二字臣不敢不剖明白君為臣綱父為子綱君臣還在父子之前古來列國君臣可以去此適彼今一統君臣為臣子者無所逃



乎天地即臣父母皆受君恩而無所逃臣又逃于何所祖宗朝非其人不奪情臣控辭不獲命意詞臣中必有博通經義者可以代臣力言回天聞道周為人所宗意必有持正之言今謂不如鄭鄮臣始歎息絕望鄭鄮杖母禽獸不知道周又不如彼還講甚麼綱常道周奏大臣聞言義當退避未有跪在上前爭辨不容臣盡言者嗣昌奏臣為綱常名教不容不剖委體非體望皇上用道周而放臣上曰這疏也不為奪情近日人情各有所為道周奏臣為一人之私只用緘默自取富貴何若與他對辨上曰你無端污詆大臣又以大題目說他不得不辨道周奏臣與嗣昌比肩事主比不得詆毀大臣上自少讀書于今五十年

無一事不可對君親上曰既如此又說不如鄭鄮道周曰臣原說文章不如鄭鄮上曰你說陳新甲走邪徑躡捷足何為邪徑疏中軟美容悅叩頭折枝者是誰道周奏人心正則行徑皆正邪則行徑皆邪新甲在蜀中聞命辭謝往復須八九月不得來盧象昇又不得去嗣昌在司馬堂則可政府則不可嗣昌一人為之則可呼朋引類使成奪情世界則不可上曰朕正要再問鄭鄮五倫皆絕許曦等說他罪狀甚明雜職到有公論道周奏臣若有心功名富貴只當附和說鄭鄮不孝豈不能取悅正是臣無所為古今獨立敢言之人少讒諂面諛之人多故臣不得不言上曰少正卯當時亦稱聞人心逆而險行僻而堅言偽而



辨順非而澤記醜而博不免孔子之誅今人多類此道周奏少  
正卯心術不好臣心正無一毫私上曰前以爾偏激稍示裁抑  
後聞操守隨即賜環前日暑天仍成一篇文字才亦可愛不圖  
這樣恣肆道周奏臣今日不盡言負陛下陛下殺臣則陛下負  
臣上曰你的說都是空話一生學問學得這張佞口起去罷道  
周叩首起復跪奏臣還將忠佞二字奏明人臣在君父之前獨  
立敢言者為佞是在君父前讒諂面諛為忠耶忠佞不分邪正  
不明矣何以致治上曰不是輕易加你佞字你這邊便遁在那  
邊非佞而何若論紅牌轉換支吾就當斬道周起諸臣各叩頭  
上又召面諭曰朕不才不能感發公忠為國之心不智不能辨

別是非邪正不文不能宣布德化不武不能削平禍亂凡此皆  
朕之寡昧即朕之愆尤關係國運世道人心今一等機械存心  
的專於黨同伐異假公濟私纔簡用一大臣百般詆毀律以祖  
宗之法當何如今虜寇邊易治衣冠之盜卻難除以後再有這  
等立置重典閣臣以下皆承旨退道周降五級調外任

同時疏論嗣昌奪情者自何楷林蘭友外又有修撰劉同升編  
修趙士春皆奉旨降三級調外任南京兵部尚書范景文等公  
疏請允嗣昌守制召還黃道周何楷等上責其朋謀把持查主  
稿何人景文再疏認罪命削職為民南道御史成勇疏言臣見  
嗣昌疏有仁不遺親義不後君之語反覆辨論無非避不忠不



孝之名是嗣昌猶知有君親猶可以忠孝之言告也今即就其言詰之嗣昌謂古之君臣列國之君臣可得而避今之君臣一統之君臣無逃於天地之間是三年之喪可行于古而不可行於今不知嗣昌所引者何古所指者何臣所據者何代之經何國之典豈非聖諭所謂另一邪說者邪信如其言是凡為臣者皆不當終三年之喪終則為後君為不臣先聖之詩書可焚先王之典禮可廢不舉人類而為禽獸不止也上責其黨同伐異命逮問

先是道周疏御筆票輕處嗣昌惧其復用也急募張若麒上疏言道周飾六藝以文奸言務在假托道理以把持朝廷顯行其引類呼朋之計又有老魔之赤幟既拔山魃之穢態難藏等語未幾若麒遂以刑部改兵部矣至壬午年甯錦告急若麒奉命閱視逞臆催戰以至陷沒甲申闖賊之亂若麒屈膝投誠得授偽官其人本末如此可見矣

張若麒既營求嗣昌調部有日矣御史涂必泓忽出一疏言刑部所司民命而人都厭薄之是以司官強半皆鄉科任子偶有一甲科輒調別部豈司民命者當專用不肖乎請著為令刑部官不許更調奉旨申飭若麒憤無所洩乃出平賦役疏謂鄉紳隱匿賦役遺害小民內有鄉紳豺虎等語有旨鄉紳豺虎等語據實回奏若麒乃指莊應會范良彥袁弘勳奉旨俱行撫按逮



問若麒初意因與同鄉高弘圖爭一庄田構怨將指及之或告以弘圖立朝大節忤璫去位萬不可誣誣之必于若麒大不便不得已乃以三人充之袁范皆巨惡袁尤逆黨護局之魁也然張之為此實涂疏激之使然涂與楊廷麟同鄉同年遂疑楊實使之後與嗣昌比所以修怨于楊者不可解矣

戒諭皇親駙馬不安分義受投獻霸佔者許科臣糾參又諭周奎田弘遇袁祐尤非他比宜先率禮為諸戚臣倡袁與田係貴妃父也袁妃居翊坤宮田妃居承乾宮袁僅生一女寵愛去田甚遠祐亦謹畏與弘遇相反弘遇好結納縉紳皆樂與往還承乾鋪設皆弘遇外備古玩時器及壁間字畫無不精好妃又洞

曉音律管絃琴奕色色皆工間侍上鼓琴聖情悅豫上因誇于國母曰后獨不能此乎國母正色對曰妾本儒家惟知蠶績且曰妃從何人授指法上色動妃自言妾母所教遲數旬妃母入宮寔能鼓琴上意始解

武清侯李誠銘慈聖太后

神宗生母

內家也上以國用匱乏為憂閣

臣薛國觀首謀勸借言在內惟戚畹非上獨斷不可因以武清為言遂傳密旨借四十萬金李氏初不在意督之日急武清死督其子國安國安死提其家人追比房產俱行入官有一女子子字嘉定伯之孫嘉定請命于后云人當急難自無絕婚理但取此女歸勿攜帶一物也諸戚畹合詞請寬不允戚畹遂人



原評即慈聖也然心自  
內聖附會而上帝已動  
即韓愈之誅法於此矣

人自危後因皇五子病亟有九蓮菩薩下降之語又見慈聖於  
空中上大悔悟諭停追比復武清候爵房屋祿米仍頒給焉  
上初年崇尚天主教徐上海教中人也既入政府立進天主教之  
說將內殿供養諸佛像毀碎至是悼靈王病篤上視之王指九  
蓮華娘、現立空中、歷數皇爺毀三寶之罪及苛求武清云、  
言訖而薨上乃痛悔前事頒諭內外有但願佛天祖宗知不願  
人知等語幾不成皇言時閣臣皆從外入不諳文義宰相須用  
讀書人初年曾舉以諷諸臣至此何乃惜然  
樞臣楊嗣昌上四事機宜疏請于卿寺科道等官不拘常格推  
補臣部侍郎其久推不至者俟其到日于別衙門填補蓋指惠

原評沈宙者之為人未  
可知然其跡多可採也  
其言亦多切於新甲  
尤切未可以人廢言也

世揚吳姓也末云職方一司奈冗之極時設協理員外分任其  
勞而余爵久推不至請武選主事孫嘉績陞補而車駕主事漆  
嘉祉等到任無期請勅吏部題沈迅調武選張若麒調車駕沈  
既調即上疏條陳邊務一云州縣無重臣彈壓故敵所至輒陷  
請于定州蠡縣廣平河間等處各添設兵備一員一云以天下  
僧人配天下尼姑編入里甲三丁抽一朝夕訓練可得精兵數  
十萬其餘條陳別事多類此嗣昌具覆盛稱其可用請改迅科  
員有旨沈迅着改兵科給事中

九月 日以邊警命丁憂總督盧象昇留督天下勤王兵入  
衛初三日漏下二鼓傳聖諭平臺召對盧即策馬夜詣都門平



明入朝。上諭遠來入衛。忠勤可嘉。賜花銀蟒幣。畢。問方略如何。象昇奏命臣督師。臣意主戰。上色變。有頃曰。朝廷原未言撫。這都是外廷議論。又曰。勦□與勦寇不同。卿宜慎重。

先是樞部曾以舜干羽于兩階。七旬有苗。格喻盧宜撫。上云。此與三苗不同。三苗止負固不服。□乃凌犯天朝。所云撫議實出外廷。洵有自矣。

十七日。嗣昌赴軍中。會議。盧面折之曰。公等堅意言撫。獨不聞城下之盟。春秋恥之。且象昇叨承劔印。長安口語如風。倘唯從議。則袁崇煥之禍立至。况麻衣引紼之身。既不能移孝作忠。將忠孝胥失。何以載顏面于人世乎。時嗣昌並在制中。不覺色

戰心忤。奮言曰。若如此說。老先生尚方劔。當從學生用起矣。盧曰。尚方劔當從自己項下過。如不能殲敵。正未易以加人。若舍戰言撫。養禍辱國。非某所知也。已復以手書折之云。若獲濟封疆之事。即胸中有如許怪事。始終不向君父一言。倘閃爍奸欺。到底當灑血丹陛。無言不盡也。

嗣昌自刻中樞集。亦備載盧此書。想其良心亦有所不能諱。不覺自暴其罪矣。于是嗣昌益周慙沮。定計置之死地矣。

編修楊廷麟疏言。東西從約。墻領失事。楊嗣昌主款之誤。至此極也。因策事之可憂者。在外有三。在內有五。且言督臣盧象昇以養寇責樞臣。言之痛泣。夫南仲在內。李綱亡功。潛善秉成宗。



澤隕恨。陛下宜及此時。正言款之罪。諭督臣集諸路援兵。別其強弱。以分險易。及今一創。當必不敢再犯。凡天下之功。不成于智而成于愚。者之才。不生於功而生于學。陛下毅然內斷。先治內以治外。使諸臣以學自衛。以愚衛國。疏上。命改兵部主事。赴象昇行營贊畫。

十一月初七日。召三品以上及科道官入對。是日天風霾久之。上傳俟風少息進見。諸臣叩頭畢。上曰。在內之賊深入南方。關外又報有賊。作何勦禦。錢糧平時壓欠。今有警。一月費折色三十萬。本色二十萬。作何措置接濟。有良策面奏來。良久言調度方略。紛、不一。至言錢糧無措。則有言令在京官民合助者有

言。令在京官與親識商人借貸。俟皇上財用有餘之日還之。否則各官回家變產還之。科臣范淑泰獨奏。戎事要在行法。不行而憂餉。即天雨粟地湧金何益。上曰。朝廷何嘗不欲行法。淑泰云。今口臨城尚無定議。不知是要戰是要款。上問主款之說何來。對言。外邊有此議論。又言凡涉邊事。邸報一切不抄傳。外邊皆以為諱。上曰。關係機密。不許抄傳。若塘報如何不抄傳。上命閣臣。卿等過來。諸臣平日營私。不實心做事。有實心者。又憂讒畏譏。不敢做。所以如此。若平日用心。只以朝廷之事為事。焉有不濟之理。可將諸臣面奏的同商酌奏來。樞臣嗣昌奏。盧象昇先言欲南去。留總監高起潛。在京防守。已又言奉旨會同。似難



難獨往仰請聖裁。或留或遣。上曰。象昇一人。豈能專勦。嗣昌奏三協撫。道守令須得人。因及推舉之難。又言設處錢糧無策。欲權開事例。行之南方。上曰。親民官取償于民。不可開。其餘斟酌開來。

十一月初十日。□兵陷高陽。原任少師大學士孫承宗死。子五人。孫六人。與從子孫八人皆死。婦女童穉同死者共三十餘人。諸子皆被服儒素。鏃礪文行。二郎壬子舉人鈐。四郎秀才銓。五郎尚寶司丞鑰。尤奇偉。善騎射。曉兵事。城陷之日。鑰解表血戰。死于城下。鈐戰敗不屈死。鈐子中書舍人之沆。秀才之滂。皆死。三郎鈴之子秀才之淙。被執。誑曰。引我得見宰相。以金帛與

原評  
振行狀  
孫送  
死五五人

汝。曳至老營。見其祖。拜而起。即接手大罵而死。銓之子尚寶丞之誥。鑰之子之濂。與六郎鈺。七郎鎬。皆戰死城下。銓被重傷。卧積屍中。家僮侯果自任丘逃歸。見之。脇中三矢。鏃不可拔。口張不能言。果負之歸城南庄。覓水半瓢灌之。氣上而絕。果以十四日得主屍于圈頭。以次行求諸子孫屍。乞於親戚。松棺柳翼。斂以麤布。而鑰鎬二屍終不可得。事聞。上惻然念慘。及闔門首命。優恤。當國者擬其事。久之。部始題覆。僅復官。予祭葬。或曰。高陽令雷覺民。首輔薛國觀私人也。盡逐平日守城官兵。剋其餉。以致城陷。事敗。遂匿國觀所。長孫錦衣之滂。詣闕。願天語侵縣令。以此逢國觀之怒。故卹典不獲全給。



孫公在天啟時督師關門鎮守有功以忤逆奄而罷已已之役復起原官出鎮二年邊警頓息又以其為諸正之領袖也構而罷之至是城破狗難完節全歸亦何憾哉

首輔劉宇亮請躬行視師上命革總督盧象昇任聽勘以劉往代十二月初六日上御平臺召見宇亮奏謝言原題督察驅勦幾輔雲晉惟賊是求非敢獨當一面今奉命代總督未免是一面之任不能督察諸方上諭鑒卿忠憤定可成功故有此委任行間有一總督賜上方行事無以復加如止督察驅勦不過是監軍豈有監軍用如此大臣楊嗣昌亦奏請行上曰一時輔臣無遣兩員之理諸輔薛國觀等同奏首臣宇亮初具揭時臣等

咸言事體重大且兵將不相習還該斟酌上以成命已頒未便挽回劉出未幾終以無功罷歸時謂同事者有意逐之也

十二月十一日總督盧象昇率兵逐□於賈庄兵敗死之時盧雖擁總督之名兵寡餉缺呼應不靈既奉革任聽勘之旨時中樞為必不相容因親率兵尾敵索戰追逐十里手砍數級三鼓還營□兵大隊圍賈庄對面不相視大帥虎大威猶能認盧力挽其馬盧以鞭擊其手不肯出圍縱兵血戰自辰至午矢盡力竭左乳忽中流矢方抽矢出鏃已復腰中一箭腦後右腮面門各中一刀遂歿于陣從殉者義勇顧顯掌牧楊凱陸二至十五日副將劉欽始獲其屍贊畫楊廷麟迎至真定東關新年二月



二十八日始克大斂距死之日已八十日矣同死者衆屍枕藉不可辨盧以首帶巾白網巾故總識之監高起潛匿不以聞贊畫報至上曰大臣陣亡豈不可閱恨其調度舛錯不准予卹蓋入楊嗣昌之譖也于張總國棟至兵部欲緣飾透怯之狀上聞國棟不肯嗣昌大怒欲刑之國棟曰死則死矣忠臣而以為逗力戰而以為怯何可誣也始愧而釋之

廷麟之題贊畫也因其疏忤本兵兼以張沈之憾故相比為謀寔欲假手于圖以殺之盧未出師之前遣廷麟至真定與孫傳庭議事不及於難敗衄報至嗣昌首先問曰楊翰林死否報者止知贊畫不知翰林為誰嗣昌再問曰楊贊畫死否

報者答以已先奉差不在營中嗣昌為不豫者久之嗟乎敗報之至正國事危急之時宜如何震懼失措乃止計及私仇未死者欲其死已死者欲飾以罪大臣心事如此

盧公為吾郡宜興人少年登第夙負英略兩任畿輔府道即以知兵聞迨為七省總理所至躬先士卒斬獲甚多賊亦畏畏之相戒不敢犯盧家軍也自盧去而賊益猖獗不可禦矣使當日終以勦賊事任之必能成功倏調之于邊已不能竟其用又以中樞之齟齬厄而置之于死地竟使人才與國運同盡也悲夫

十二年己卯正月北兵自臨清分部東下掠破章丘等縣直趨



濟南城中新兵皆叛。劫德王府，開門迎敵。以德王殉于城下。左布政張秉文、參政鄧謙、副使周之訓、運使唐世熊、知府苟唯善、同知陳虞胤、通判熊獻、知縣則歷城韓承宣、臨邑宋希堯、武城李永芳、博平張列、宿荏平黃建極、章丘高仲光等皆死之。焚掠數日，又出濟南向東北，所過攻城，惟武定不下。連破益山、慶雲等縣，復回哨破海豐。已由青山喜峰口出塞前後。月破順天二縣，保定九縣，河間十一縣，真定十九州縣，順德六縣，廣平四縣，濟南九縣，兗州二縣，東昌七縣，共七十餘城。已覈東省失事諸臣罪案，以撫臣顏繼祖雖奉命守德，夙事虛恢，削籍聽議後，竟逮問。同薊撫張其平、總監鄧希韶、總兵倪寵、祖寬等三十餘

陳祖苞明史二百四十八附顏繼祖傳海寧人陳之遴入國史貳臣傳明中允至順治二年授誠授秘書院侍讀學士官至太子太保宏文院大學士文飾欺蒙論死寬免漢官加少保萬曆太子保法仍革職流徙籍沒死徙所國朝別裁云之遴崇禎十年賜進士第二人

三人俱棄市。順撫陳祖苞先服毒死，其子編修之遴以丁憂請上，追恨祖苞未正法，命錮之。遴永不叙用。先是沈迅條陳有東撫不許離德州一步，部覆如議。繼祖遂認定汎地，僉謂敵無越德而南之理，不意竟由東昌破丘縣，夏津直趨濟南。濟南精兵既盡在德州，城中無備。當事又無方略，民潰遂陷德州。聞省城陷，兵心推擾，鼓噪挾餉。繼祖惧急，以數千金塞其望，而兵遂以不可用。繼祖疏申言原派不許離德州之地，嗣昌力排之，竟及于禍。

劉宇亮既自請督師，各鎮勤王兵皆屬焉。時兵將皆視口所向，以為趨避。多蹂踐居民，至安平偵者報賊至，皆相顧驚愕，擬趨



晉州城以避之。晉州知州陳弘緒素負韜略，閉門不聽入城中。士民亦歃血為誓，不許延入兵丁。劉大怒，傳令箭且將以軍法從事。弘緒復語督師以勦敵為任，今□將至，正建功之時，奈何反欲入城，卒不聽。劉遂疏劾之，有旨逮問。晉州士民詣闕訟冤，至願以身代知州之死者，不可勝計。弘緒得以輕處，降四級調外用。上乃頗疑督師擾民矣。

劉既由晉州而南，行間大帥多尾□不敢擊，亦不能擊。劉上疏言之，其未帶言劉光祚、嗣昌與國觀謀，以此去劉，乃票光祚軍前正法。旨到日，諸大帥俱分道前去，并光祚亦不在軍前。况原參疏中罪原不至死，適有武清之捷，劉乃置光祚于縣獄而復

請之，并上武清捷音奉旨，倏叅倏叙，殊屬乖藐。着九卿科道看議，嗣昌明知聖旨往還之間，必致參差，必不能正法，而遂劉之計行矣。部覆劉宇亮冠帶閑住，陳啟新言看重議，輕沈迅言明旨森嚴考功之法未盡，于是改議革職為民國觀票旨仍候事。平另擬此揚薛二人主謀排擠，搆陷甚巧，故明旨止言看議而加以議處。

張獻忠既降復叛，初獻忠假官軍旗號，暗襲南陽屯，南陽援勦總兵左良玉適至北關，疑之，使人召之。獻忠窘逸去，良玉追及之，兩馬相望，一箭射中其肩，一箭中其指，於弓靶獻忠惶惶間，良玉舉刀劈其面，血流被甲，部下孫可望力前格之，獻忠乃得



脫逃至麻城良玉追勦之獻忠兩日夜馳七百里至穀城營于王家河戊寅正月初九破穀城出示安民云本營志在匡亂已逐關遠遁本營釋甲歸朝爾百姓其無恐遂拘耆老具揭遣可望通賄熊文燦內有西碧玉二方長尺餘又有徑寸珠二枚文燦遂一刀擔當撫之二月良玉至襄陽巡按林銘球巡道王瑞旃欲誘獻忠來見執之文燦言殺降不祥力持不可獻忠恃文燦為援益無忌私練士卒鑄軍器穀城諸生徐以顯一見如故教以孫吳兵法已卯春叛形昭著左良玉請討之文燦故張露其事且強留良玉飲餞稽延時日俾獻忠得預為備獻忠乃得從容運器甲資糧入房山部署已定文燦始出令進兵良玉曰

五回督臺縱虎負嵎使我撻之不去必以逗留罪我令旗至即冒暑進討遇伏大敗良玉乃列其事於朝樞輔楊嗣昌劾之以十一月逮文燦付法司擬罪至庚辰十月棄市次年復逮總督鄭崇儉下獄以縱兵擅回失悞軍機為罪擬辟以五月棄市其罪寔輕于文燦竟同罹大辟論者為鄭寃之

樞輔楊嗣昌疏議州縣召募鄉兵須專訓練之任或更府佐一員為將領州佐一員為守備縣佐一員為把總裁訓導之一為武職府卒一千州七百縣五百其工食或量於地畝或取於牙行或富義之捐資或居民之絕產設法通融以倣古時文武相兼之制上諭行之工部侍郎疏言其不便者數事上命責成撫



按詳議究竟徒滋騷擾未能畫一奉行也嗣昌先又有疏建議  
考試生童必兼試騎射議鄉試副榜准作恩貢送入國子監行  
積分法其數視正榜之半先一日發榜以杜私弊俱允行後副  
榜貢至京送監但考一二優等便以科道自居卒之未嘗用一  
人得一人也次科仍停不行

御史王聚奎劾陳啟新緘默失職上責其妄下都察院議處僉  
都李光春議以罰俸上不悅竟謫調外任以吏部董羽宸不能  
駁正奪俸六月上怒光春不已罷黜之然啟新之用上亦悔之  
只是不肯認錯其後姜埰上互糾之疏下部看議部議有刀筆  
之語上不悅諭輔臣曰處分可矣管他甚刀筆

八月命大學士楊嗣昌督師討賊賜上方劍督師輔臣銀印給  
帑金四萬賞功牌千五百蟒紵緋絹各五百九月陞辭賜宴平  
臺後殿復賦詩寵其行詩曰鹽梅今日作干城上將新開細柳  
營一掃寇氛從此靖還期教養遂民生所以寵之者至矣嗣昌  
馳至襄陽申明軍令鼓舞將卒一時赫然有賊黨劉國能來降  
國能者陝西諸生衆亂推為帥至是降于嗣昌、造其壘信  
宿而返國能感動傾心嗣昌先遣兵搜捕李自成、跳入雒  
陽深山中不可得而均州賊帥王光思亦來降嗣昌以左良玉  
所部多降將謂可倚以辦賊疏請於上拜為平賊將軍又奏辟  
永州推官萬元吉為軍前監紀次年二月復賜內帑萬金賜斗

原評國能之降在武  
陵未出之前造壘信  
宿移亦未知何據

原評時自以為秦兵  
所敗伏商雒山中為賊  
嗣昌未嘗遣兵搜  
捕也



牛服又賜海驕馬一棗驕馬一嗣昌駐軍襄陽大調各路兵會  
勦時老回革裡眼左金王南營四股合二萬人分屯南直英  
霍潛太諸山寨犯安慶桐城諸路遼將黃得功川將杜先春屢  
戰屢卻賊每避兩軍賊購黃人為間或携藥囊著蔡為醫卜  
或談青烏姑布星家居言或為緇流黃冠或為乞丐戲術分布  
江皖諸境覘虛寔時突出焚掠流毒四境

十三年庚辰正月考察天下官員東廠緝獲賄冊進覽命掌科  
阮震亨掌道周堪賡回奏吏部尚書謝陞疏參震亨通賄敗類  
有據命下鎮撫司打問震亨竟死杖下又逮劣處貪官浙江布  
政司姚永濟等三十七人下刑部獄究問先是丁丑外計永濟  
以錢糧積欠部覆為民浙省在京諸紳溫體仁姜逢元等五十  
餘人合詞保留稱永濟居身廉慎核弊嚴明為從來方伯之冠  
乃准降級管事至是又以貪處若追問前此保舉之罪不知何  
以解也

仙居知縣過周謀為薛國觀門生托同鄉吏部員外熊文舉營  
轉禮曹令文舉之父貽書入京隱語餽國觀五百金時文舉方  
奉陝西典試命未還京也送書人為東廠緝獲上聞國觀疏辨  
命逮文舉父下獄究問文舉具疏為父代罪不允與周謀俱遣  
戍

文武品官服色祖制既定奉行已久惟是武弁概服獅子上至



是重行申飭武臣三四品俱照制服虎豹至內臣從無定式蓋直擯之灑掃服役之末祖制良有深意雖太監極尊止于正四品間有賜蟒不過舊衣之賞賚耳是時上取山海經進覽採取各種獸名定頒服式以天駭馬為極品識者謂至尊左右環列異獸蓋不祥也

十三年庚辰三月十五日上御皇極殿策諸進士上乘步輦降殿階從容周視距諸生几案咫尺上親閱試策諭禮部傳臚展期十九日傳旨召進士楊瓊芳等至會極門中使執名冊傳呼某人等四十人至文華門外序立上御殿諸進士行一拜三叩頭禮畢上諭曰尔等前日所對的策切寔的固有縱浮的亦多

特召爾等四十人來問國雪恥一事尔等學問之功既久時勢之感又深各將胸中所見明白奏來如切實可用不拘常格用諸士承旨起過東偏立中使捧一黃綾函傳御題十幅即面諭每四人共閱畢以次跪報姓名對上注聽甚殷執御筆書錄數語或有名註圈點者分十班對畢行禮出二十日傳臚賜魏藻德葛世振高尔儼及第又傳聖諭昨召諸士奏對明爽者趙玉森姚宗衡劉瑄孫一脈嚴似祖着授翰林黃雲師周正儒宣國柱周鼎李如璧授科員馮垣登陳純德陳羽白魏景琦吳邦臣授御史稍明者董國祥顏渾張朝縱葛奇祚錢志騶張經呂陽盧若驕蔡肱明田有年授吏兵二部司務即行察缺填補



初閣中炤例進十二卷上命取餘卷至再三皆以十二卷進共至四十餘卷皆一召對親拔數人藻德北通州人自言三次守城功上心識之遂拔第一壬午冬復以面對稱旨超拜詹事入閣旋正首揆甲申之變不能盡節為賊夾辱而死負恩甚矣上以考選不列舉貢傳諭吏部將廷試就教舉人貢生二百六十三人吳康侯等悉炤進士選授部寺司屬推知等語此係特用後不為例于是與選者遂豎黃旗竿稱御進士此一奇也然卒無一人可用可副破格特恩者

江西巡撫解學龍疏薦布政司都事黃道周有學問直貫天人品行無忝周孔等語上以道周黨邪亂政學龍徇私藐法俱不

着緹騎逮問工部主事葉廷秀上疏救之上怒甚命廷杖廷秀一百道周學龍各八十俱仍下刑部擬罪國子生涂仲吉復上疏言道周清忠苦節昔唐太宗恨魏徵之面折至於殺而終不果漢武帝惡汲黯之直諫雖遠黜而寔優容皇上欲遠法堯舜奈何出漢唐主下通政司格之不上仲吉併劾通政使施邦曜遏抑言路上怒逮仲吉廷杖一百邦曜革職下道周等鎮撫司打問逼供同黨鍛鍊甚酷乃指數員塞責因及通政馬思理編修黃文煥吏部主事陳天工工部司務董養河中書文震亨俱下獄有崑山諸生朱永明持百錢貽仲吉亦在招中刑部司官吳文燦遲案不上廷杖六十革為民諸人杖皆不死得錦衣郭



原評道周與子龍遺  
成爲司寇劉澤深  
奏之力後以宜與微  
環召非淹滯獄中始  
解網也

原評信諫公言兩中  
翰股後大為韓城  
其事甚確

承昊調護力也刑部尚書李覺斯亦革職為民一番具招一番  
嚴駁滯淹獄中一年餘至宜興再召片語回天始得解網後卷  
是時武陵亦已自盡矣

大學士薛國觀冠帶閑住給事中袁愷再疏劾其納賄有據并  
及吏部尚書傅永瀆刑部侍郎蔡奕琛等並免官又逮左副都  
御史葉有聲下刑部究問時株連頗衆旋遣緹綺逮問國觀到  
京師賜自盡籍沒家產入官國觀初與嗣昌比謀去劉宇亮遂  
正首揆益無忌憚任用私人王陞彥通賄賂于外怒老中書周  
國興楊餘洪不為用捏洩旨事參之皆弊於廷杖兩人家遂  
密緝其納賄事件投於東廠令其事件密聞于上、心動久矣

適史堇死所輦多金為布置地者皆入于國觀周楊二家嗾堇  
之家人出首事已上聞錦衣衛提其長班鞫問供吐甚詳國觀  
疏辨猶揚士聰之參史堇別有緣故又稱堇曾參黨人袁崇煥  
等為黨人報復云、而已奉旨議處私人王陞彥下獄部覆國  
觀閑住出都之日、賍私累、用車數百輛兩家復從羅卒且事  
件密奏聖心益怒特旨王陞彥即着會官處斬而國觀復逮凡  
招上或斬或絞卷中已詳奉旨止云即着會官處決今陞彥招  
未成裁自聖斷故云斬決此旨從來所未有也後吳昌時之斬  
奉旨亦與此同  
人謂陞彥之罪寔由昌時  
設謀構成故天報不爽 國觀逮至候命外寓而即令自盡之  
旨下時已高卧家人報錦衣賈詔至感然曰我死矣倉卒覓小



原評王遇害非自殺也

帽戴之宣詔畢頓首不能出聲自盡後緹帥驗視回奏次日始奉旨准收斂蓋懸梁者凡兩晝夜云

原評此係王紹禹所統率非王府人也

十四年辛巳正月十一日流賊李自成陷洛陽福王自殺先是河南撫鎮分汎禦寇總鎮王紹禹主守雒城賊在宜陽永甯殺王戮官紹禹即揭報撫臣且盟在城各官分門監守羅劉二將營于城外十九日賊至羅劉戰敗賊遂抵城下二十日力攻一日至更餘有叫喊于城上者兵士盡譁先執王守道索糧王府中人開北門放賊入守道王胤昌知府馮一俊鄉官尚書呂維祺寺副刑紹德俱不屈死賊入王宮執福王將擁戴之云神宗皇帝原有意傳天位于大王叱之曰吾從不聞此語何敢背

原評此俱失實必知光南渡時小沈家飾詞

義造誣賊又請王諭筆王不可賊遂以繩進請王自裁王又叱曰任汝殺我賊遂兵縊殺之有小內官崔升勸王甯死勿屈抱王至死不去并見殺兩承奉告賊以棺斂王尸亦即自殺賊盡焚王宮留十餘日煮粥以餉飢民又考賞秀才於二月初二日棄城閉營一路上魯山一路上汝州劫掠滿載去後授書辦邵時昌為總理統守雒城閱一月後巡撫李仙風至孟縣誘執賊將以兵臨雒城時昌開門迎入仙風遂以恢復奏聞言福王受警病死旨責其欺飾逮下獄論斬

二十四日上御乾清宮召閣部科道諸臣入諭曰朕御極十四年國家多事復遇飢荒流寇猖獗近且攻陷雒陽福王被害夫



親仁民仁民愛物親叔不保皆朕不德所致真當愧死聲淚俱下閣臣奏此係氣數所致上曰說不得氣數就是氣數亦須人事補救年來何曾補救得幾分召兵科張縉彥命將河南事奏來縉彥奏福王遇害是真遇害時有內員環泣不忍去上問何名縉彥奏是崔升又問世子有何人跟隨縉彥奏聞有王府校尉數十人上長嘆淚下因奏福王身死社稷葬祭慰問都宜從厚上曰說得是因召禮科諸臣曰朕欲差一員前去各奏來李焟奏督師出兵一年有餘惟初次有瑪瑙山一小捷今遂寂然須另遣大將幫他上曰督師去河南數千里如何焟管得到你們亦當設身處地李焟奏因其照管不來故請再遣上又曰

已遣朱大典便是大將章正宸奏聞賊從四川來樞臣陳新甲旁立急應曰自秦來不自川來言至再蓋從川來則其責在嗣昌也上召新甲諭曰卿部職司調度須為朕執法如姑息悞事皆卿部之罪縉彥奏雖封失陷凡王府宮眷內外官紳士民焚劫甚慘急須賑濟上曰朕即措發諸臣叩頭退即傳諭駙馬都尉冉興讓太監王裕民禮科葉高標前去河南慰問世子詳察福王宮眷存亡及殉難官民人等除前發賑濟銀三萬兩外御前發銀一萬兩坤甯宮四千兩承乾宮三千兩翊坤宮二千兩太子一千兩慈慶宮一千兩慈甯宮皇祖昭妃五百兩皇考定妃五百兩費去支用



二月初 日張獻忠陷襄陽殺襄王屠王府官民人等數萬人  
先是嗣昌在本兵時議兵十餘萬於各邊特加練餉更浮于遼  
餉之數至是即撥練餉為勦寇之用餉足而民怨已極嗣昌進  
勦張獻忠 出戰墮馬幾被擒復逃去逃入瑪瑙山中嗣昌  
令降將劉國能圍之獻忠食盡分兵四出抄掠不得糧者歸即  
殺之其未歸者懼殺詣軍門降國能將之前行偽稱糧至獻忠  
開營延入國能乘其不意縱火大戰掃其營壘擒其妻孥及賊  
黨徐以猷潘應鰲等送襄陽獄獻忠批藤墜岩澗逃去率眾直  
走四川隨又困之竹溪房縣大兵四面固圍無毫髮間隙可容  
片甲遁去而蜀撫邵捷春與嗣昌不相合又聽讒言殺戰將楊

原評武陵楚人正統  
逐賊入蜀豈獨蜀  
撫之失耶

茂選軍士皆怒於是夔關失守賊復逸出署部稍定復返湖廣  
假稱楊閣部兵至坐乘八轎併民扛火藥文書印信皆同道府  
不疑延之入城 上火起賊盡入合城鼎沸獄中者俱出與之  
合先攻襄王府執襄王坐之堂下獻忠勸以卮酒曰吾欲斷楊  
嗣昌之頭而嗣昌遠在蜀今當借王頭使嗣昌以陷藩伏法王  
其努力盡此一杯酒因縛王殺之遂焚其屍又殺貴陽王常澄  
等四十三人承奉閩國鼎等八人知府王承曾保福清王常澄  
得脫督輔楊嗣昌在荊州聞變懼禍遂自縊死時三月朔日也  
監軍楊卓然以病故聞上諭部院嗣昌雖二載辛苦一朝盡瘁

有瑪瑙山等諸捷不能掩闕敵鷗張兩藩罹禍名城屢陷殺掠

原評自蜀回至王莽  
陵間復自裁



頻聞雖病故還着九卿科道會勘議罪

先是熊文燦檄僉事張大經監獻忠軍大經初至為陳說禍福  
獻忠頗為致敬及文燦措置乖方獻忠遂拘大經為質大經悔  
為文燦所賣鬱死於房縣中獻忠駐紮穀城時知縣阮之鈿  
多方調護士民賴之獻忠叛之鈿瀝血書絕命詞于襟仰藥死  
其破襄陽也知縣李天覺北面叩首置印于案自縊死推官鄺  
曰廣被執不屈死嗣昌之初出督師其輜重裝入大鏡中寄于  
固始縣庫死後知縣時敏盡取之以歸不下數百萬敏以此營  
兵科甲申降賊後先為鄉里搶掠其半乙酉之變盡行燒毀併  
殺其身焉今其子且不免負薪矣嗟此皆民脂民膏也天意

豈容若輩享哉

蜀撫邵捷春為楊嗣昌疏參奉旨差官旂達問捷春夔關之失  
不為無罪然在地方寔得民心軍民因闕然逐散官旂蜀王為  
之疏請奉旨朝廷大法豈容百姓阻撓邵捷春着巡按官差護  
送來京下刑部究問坐以失悞軍機決不待時斬旨未下而先  
一日報卒上疑有洩漏情弊并處該司官

自邵捷春得罪後繼之者為陳士奇但清謹而無禦亂才故  
蜀事益不可為矣蜀紳初舉臬司馬乾者得民心有邊才宜  
推為撫當事知其為乙榜也故抑之而別推噫此何時也何  
地也而猶拘資格耶



諭吏部凡遇侍郎巡撫員缺須將資深翰林同推各部侍郎仍許兼侍讀學士惟巡撫不許于是推詹事李紹賢為戶部右侍郎督理錢法未幾又推原任祭酒倪元璐為兵部右侍郎刑科胡周鼎疏言外戚張國紀所記懿安皇后事當日岌岌可危今皇七子降生宜加聖后徽號上以其無端突發疑窺伺宮闈令回奏旋革職下獄

內閣范復粹奉旨清獄囚奏各犯官共六十六名內而尚書侍郎都察院科道部屬外而督撫司道府縣等官無不畢具如原任尚書侯恂傅宗龍府丞戴澳巡撫黎玉田常道立方孔炤給事中宣國桂耿始然御史成勇魏景琦兩司范良彥賀弼司屬

倪嘉慶孫嘉績熊汝學朱國壽朱日燦諸犯各殊幽沉則一當下部作速清理又特舉原任江西布政朱之臣總兵劉光祚之才乞復官起用奉旨朱之臣准還職劉光祚准軍前効用

應天巡撫黃希憲奏報擒獲江海大慙黃尚忠得空船四十餘隻為總兵王之仁守備湯夢復之功蓋尚忠不過海上販鹽之徒非寇盜比也撫臣聽信將領妄報邀功從此海上日多事矣上諭吏部以時事多艱佐理須人舊輔周延儒張至發賀逢聖俱忠猷未竟各起原官入閣辦事着該撫按官敦請就道三臣各具疏辭不允閣中自戊寅年特用楊嗣昌等五人後己卯年又用費縣張四知滑縣魏照來蘄水姚明恭三人庚辰年又用

原評後海上見多  
事並不免邀功生事  
矣



原評云金溪其以蔡國用

原評云尚有并研

德州謝陞并研陳演二人自金溪病故韓城得罪武陵督師出其餘相繼去位是時閣中止范張魏謝四人而范亦旋予告矣一時諸輔皆無有當聖意者眾推宜興才智可以仰副且林居以來又能化洛蜀之異同皈依眾正優容敗類於是庶吉士張溥禮部主事吳昌時輩為之營謀涿州舊輔與商丘相城輩亦極力資助通于內璫竟得召用雖及張賀二人而意則專在周故賀到不久即去張以病不至

活字本蓋政府自烏程之後至悲夫均依一格

時朝政嚴切歲事凶荒兵餉掣肘臺省是非訐直互尚政府自烏程之後繼以淄川韓城皆祖述故智媚疾賢才盈廷重足久無樂生懷矣宜興憂之思維濟之以寬首引用先朝故老如劉

山陰鄭建德輩召還言事遷謫科道復結誤舉人廣取士額釋漕白欠解戶併蠲民間積逋赦赦宥戍罪以下盡還家再陳兵殘歲歉地減現年兩稅蘇松常嘉湖各府許以次年夏麥代漕兌將佐功罪賞罰不踰時至卹死褒忠等事向期不予者皆朝報夕下天下仰望平糶如久汚得沐宿鬱臨春之快又特請撤回監視璫差停止廠衛緝事尤為不易得之數使天欲平治則循此不變豈非救時宰相即繼美國初三楊無愧矣乃美不克終竟使身名與國運同盡也悲夫

原評詞太悲

活字本接下不望行

原缺四行



諭吏部吏科曰朕維足國要在阜民強兵要在擇將今國用日煩民生日困朕心如傷每廷議足用則必取之於民言卹民則又慮誣于賦國與民無並足之方矣建牙設鎮不知凡幾推轂徒勤登壇罔效豈以天下之大竟無明習心計謀裕折衝者乎朕拊髀側席未獲一遇意者數求之道未盡也今特開裕國足民科奇謀異勇科使海內人士望的而趨有以自見至訪求驗考徵辟選舉更須良法務期豪傑傾心弓旌生色以稱朕破格旁求至意該部科詳議規則來行

原評此考至獻破風  
陽皇陵之後

四月差勳臣朱純臣戚臣劉文炳禮臣林欲楫攜帶識地理的往南京會同守備太監南京禮部官恭詣孝陵循行察勘附陵三十里地方及龍脈經行之所俱不許燒灰作窰并泗州祖陵鳳陽皇陵一併踏勘時有奸民誑奏地方居人侵傷陵脈者故有此遣上先期御中極殿召閣部文武諸大臣面諭再三各賜坐宴于殿上又賜欵遣三臣路費綵段

蔣德璟曰中極舊名華蓋嘉靖中易今名前即皇極後為建極雖相連而中極特為高閣上寶座周圍刻金龍形諸臣就席時上以齋不用酒止用茶計十三人、各一席、各三十餘器皆御膳所蔬菓甚精潔非光祿寺蔬也上坐覽文書司



禮大璫房旁立時跪承旨而諸臣左右坐宣德後久無此禮矣。祖制宴羣臣多在午門文華門外。惟郊祀慶成宴三品及學士在皇極殿內。永樂中召坐西內圓殿。宣德中召宴萬歲山廣寒殿。嘉靖中賜宴西苑。不聞侍坐。蓋正統中坐禮久廢矣。今上十三年始議行之。而中極自國初賜宴親王外未也。有上既遣三臣往南。成國時總督京營戀戎政印。因疏請帶印往南。又請帶京營兵千人護行。托言便道護糧艘北來。相機勦寇。上已許之。部科俱疏言其非。十八日上復召諸臣入。諭三臣曰。勦陵重典。三公正卿。帶千兵不為多。但須嚴禁騷擾。成國因言諸臣阻撓。上曰。他們說的亦是。地方供應難。且既有關防京營

印不須帶去。若言勦寇。不將勦陵事悞了。糧舡北來。此兵南去。亦難兼顧。京營印外面亦行不得。只交協理侍郎收了。

蔣德璟曰。時部科疏並入。成國甚以阻撓為恨。若各將疏意發揮。將成聚訟。上一出不言有疏。但戒諭再三。嚴禁騷擾。並解其京營印。諸臣見其言之行。不須再開口。彼此無事。形迹不露。居然杯酒釋兵權作用也。

北兵圍祖大壽于錦州。填濠毀塹。聲援俱絕。有四卒間出云。城粟足支半年。苦乏薪耳。傳大壽語。宜以車營逼之。毋輕戰。總督洪承疇集兵待援。未決。奏聞。上憂之。召問中樞陳新甲。計將安出。新甲求退。與閣臣侍郎諸臣酌議。請遣司官面商于承疇。時



活字本謂下缺

原評云余嘗詢  
宗朝舊將則洪公後未出  
戰非獨若麒之罪也

活字本前數行  
若麒謂復戰之便  
相持數日官軍大  
敗則自若麒之催  
戰為之

有七可憂十可議之奏祈 皇上察報因遣郎中張若麒往行  
營酌視若麒謂宜亟戰立趨承疇進師承疇不得已合兵十萬  
率總兵曹變蛟吳三桂王樸馬科楊國柱至乳峯近錦州五六  
里方夜連車營環以木城部署定始旦□以萬騎來攻獨國柱  
遲至結營未及掘濠敵騎乘之國柱戰沒亡失萬騎餘營未動  
又相持數日官軍大潰初錦州被圍急救至方戰未決□掘松  
山斷我歸路遂大敗蹂躪殺溺不可勝計若麒走海上從漁舟  
潛渡至甯遠承疇等退守松山未幾報全軍覆沒關門劫旅于  
是盡喪矣事聞上驚悼甚設壇都城親臨賜祭所以議褒卹死  
事者極其隆重云究所以致敗者則是若麒之催戰為之旋逮若

麒下獄擬罪

五月赦兵部尚書傳宗龍于獄以右侍郎兼都御史督兵討賊  
九月宗龍率兵至新蔡與保督楊文岳之兵會賀人龍李國奇  
將秦兵虎大威將保定兵共結浮橋渡河合兵趨項城初五日  
兩軍畢渡走龍口自成汝才亦結浮橋於上流將趨汝甯覘官  
軍至盡伏精銳於松林中陽驅諸賊從浮橋西渡人龍候騎覘  
賊還報曰賊渡河向汝矣次日宗龍文岳兩軍次孟家庄遇  
賊伏敗績人龍大威北奔國奇從之文岳奔項城宗龍獨立營  
當賊飛檄國奇人龍救二帥不應宗龍穿濠築塹以拒賊亦穿  
濠以困之宗龍兵食盡殺馬騾以享軍至十四日簡卒尚有六

活字本自此以下不  
如此本之詳



千夜漏二下潛通勒軍突賊營潰圍出諸軍星散宗龍率散卒且戰且走次日至項城賊追及被執至門下呼於門曰我秦督官軍也請啟門納秦督宗龍大呼曰我秦督也不幸墮賊手左右皆賊母為所紿賊唾宗龍大罵曰我大臣也死則死耳豈能為賊詐城以緩死賊以刀擊之遂遇害事聞贈太子少保與世廕賊遂陷項城分兵屠商水扶溝所在土寇蜂起中原山陝無甯宇矣

按傅公初巡按貴州定安酋之亂即以知兵名崇禎初年以樞輔孫公薦晉撫順天督薊遼尋以邊警逮下獄論罪復起家巡撫四川擒治川寇有功即晉任中樞在楊嗣昌入閣之

後嗣昌奉命督師討賊數上章請兵食不能悉應抗章言中樞不稱任傅公亦疏劾嗣昌徒以氣凌廷臣耗國家兵食不能報効時上方信任嗣昌為奪傅公官下之獄嗣昌敗復起三邊總督任勦寇事一時竟推其揮霍之才可以為國家獨任重擔然綜其官績按黔一年撫畿一年督薊二年再起撫蜀一年為司馬一年為三邊半年未見其有殺敵定變成效奇功也蓋有才而不用與用之而不能竟猶勿用也今傅公非不用亦用之不竟也其按黔治兵有序矣何不即以為撫其撫畿督薊雖無顯功亦無債事何以罷官論罪撫蜀未幾何以即入中樞中樞之席未煖罪未著何以復革職下獄迨



倉卒起之。囹圄即授以督師。與諸邊兵將俱未素習。而驅之使戰。遂未免一挫而死。嗟乎。但成一人死節之名。其于天下事。竟何益哉。

賊既大敗。秦督兵乘勢直破歸德。督師丁啟睿自商城北發。檄左良玉期共擊賊。楊文岳亦招集散亡于陳州。兵將稍集。自成汝才合兵陷葉縣。殺守將劉國能。初國能與自成汝才同為賊。後降于左良玉。汝才深恨之。至是聞國能在葉。誓殺必之。國能力戰不屈。城破被殺。事聞。詔贈國能左都督。

十一月。陝西巡撫汪喬年率總兵鄭家棟、牛成虎、賀人龍將兵三萬趨河南。先是喬年在陝西發李自成先塚。得小蛇。即斬以

狗。誓師進兵。以輕騎萬餘抵邠縣。時襄城先破。喬年遲疑不敢進。襄城貢士張永祺率邑人出迎官軍。屯於城下。自成聞之。解郾城圍來迎戰。喬年安營未定。有二將先逃。官軍潰。賊乘之一軍盡覆。喬年以數百人入城居守。五日城復陷。喬年被執。見殺。自成深恨諸生。遂剗削百九十人。又購永祺。匿免屠其族。九家。殺守將李萬慶。乃降將射塌天也。累功至副將。至是死之。詔贈官立祠襄城。自成再破秦師。獲馬二萬。降秦兵數十萬。威震河洛。乘勝圍南陽。城陷。總兵猛如虎死之。時楊文岳屯杞縣。丁啟睿屯汝甯。太監劉元斌率京軍救河南。聞南陽陷。擁婦女北去。俄上命御史清軍。元斌倉皇悉沉之於河。元斌以



縱兵殺掠冒功論辟未得旨即奏辨上怒之立誅並誅太監王裕民

重修太學成先命太監王德化率羣臣習儀八月十八日聖駕臨雍升彝倫堂祭酒南居仁坐講臯陶謨天叙天秩至有土章司業羅大任講易咸卦天地感而萬物化生一節命文武官三品以上俱坐聽賜茶畢行禮退上入彝倫後敬一亭觀世宗所立程子四箴諸碑遂傳禮部將學廟內各碑俱摩榻進覽又右古碑殘缺亦令察補進呈于是駕自成賢街至安定門登城上坐明轎至東北角樓親閱樓工召閣臣樞臣工臣責工部糜費久之復諭閣臣謂宋儒周程張朱邵六子不宜列于先儒之內

宜有特稱下禮部議後禮部會同詹翰各官議周程張朱邵六子俱進稱先賢云

十二月黃道周解學龍涂仲吉各擬烟瘴地永戍葉廷秀馬思理各邊戍黃文煥董養河陳天定文震亨分別配杖初刑部尚書劉澤深擬道周永戍上不允因上言曰道周之罪前疏已嚴矣過此惟有論死自來論死諸臣非封疆則貪酷有未以建言蒙戮者且皇上所擬者黨耳黨者見諸寔事道周空言無據如△者始末嘗不相與今且斥之烏有絲毫黨氣而煩聖明之震怒動朝廷之大法耶當此生死之關不敢不存一難慎之心敢仍以原擬上疏入允之



黃景昉撰黃公行狀略云江撫解公陞任荐僚屬疏例下第不足勞萬幾聞有簽貼其旁致上怒者遂得扭違之命比入獄廷杖擬罪屢嚴聲色洵莫必其命余為拉同鄉蔣公德璟王公家彥謁謝德州請之謝太息曰死矣遲杖為幸聞之失色總承韓城毒燄之後餘威尚震武陵雖出督師柄得遙參宣督遂入為中樞同憾公前疏刺骨同年費縣并研誼漢如滑縣且下石矣宜興周公新召至衆喁望丰采諸名流力憊憊之婉代開釋得免死改戍周公又于講筵平章他疏馴語及公余與蔣公同贊其說初冀得免戍幸矣竟復原官官寔出望表本聖主乾斷度越百玉天下亦以是亮周公焉

崇禎朝紀略卷四

江上遺民李遜之輯

十五年正月元旦上御殿朝賀畢下寶座南面立顧內侍命召閣臣來閣臣由殿東門入再奉旨遂至殿簷行叩頭禮畢跪以聽命上曰閣臣西班來蓋以師席待諸輔也閣臣起立不知上意擬取東西兩班上又曰閣臣西邊班來隨有一閣下引而前上宣閣臣來諸輔趨進上曰古來聖帝明王皆崇師道今日講猶稱先生尚存遺意卿等即朕師也敬於元旦端冕而求聖躬即轉面西向閣臣一揖因曰經言尊賢也敬大臣也朕之此禮原不為過今而後道德惟諸先生訓誨之政務惟諸先生

原評上南面揖非東  
西向也信諫公云



之調和燮理，奠安宗社，民生惟諸先生是賴。又曰：自古君臣志同道合，而天下治平。朕於諸先生有厚望焉。諸輔臣跪謝不敢當。上曰：先生正是當敬的。言之再三。隨諭先生起。諸輔臣始起。轉下叩頭。上還宮後，復補賜聖諭。時輔臣為周延儒賀逢聖，張四知謝陞魏照乘、陳演六人云。

諭各省直十二年以前一應存留起解上供本折錢糧盡行蠲免。又以江南荒旱，許各州府縣以麥抵漕，百姓歡呼稱慶。又從侍郎惠世揚請，豁免十二年以前贓罰銀兩，又發帑金二萬賑山東。先是十三四年蘇松常鎮四府皆大旱蝗，蟲食苗，民皆告饑。浙西三府又大水為災，一望漂溺。漕儲缺額，徵比無方，而

湖州一府尤甚。十四年七月，浙撫參德清崇德兩縣尤遲兌，悞漕。時政府方尚嚴切，遂奉旨差緹騎拿解兩縣印官。崇德令趙夔自縊死，德清令朱實蓮逮至京下獄。擬罪時漕事亦已報竣，實蓮因具疏陳地方荒苦狀，始得釋罪。調用則屬宜興為政矣。朱君字子潔，廣東南海人。天啟辛酉，方弱冠，受知於先忠毅。拔魁一經，工詩文，重氣誼。屢躡春闈，以薦舉授是官。到任未一年也。被逮後，所著詩有冬春草、吳叢、續傳先生序之曰：詩以言乎心之所之也，心乎親者其言之乎孝，心乎君者其言之乎忠，心乎民者其言之乎仁。吾友子潔氏，令臨溪，著循廉聲，忽詔獄，尋詔釋之，還其官。所撰冬草、春言、孝言、忠言、仁言，令讀。



者流連嗟嘆而不容已。因以知其心焉。先是其師李仲達侍御亦吾友也。以觸璫詔獄。所撰有受命草。亦言孝言忠言仁。足令人嗟嘆而不容已。然侍御之寃當其身不白也。今子潔幸遇聖明。復得出以展其大用。凡所言忠言孝言仁。慮無不可發。而措諸事業者。其重勉乎哉。侍御可謂有生友者矣。

御史張肯堂疏請還向來言事。遷謫諸臣。略曰。在諸臣率意敷陳。罪止成於狂戇。在聖明薄從降罰。法姑予以困衡。嘗讀封事。或議征求宜緩。或陳刑獄宜寬。或糾行間功罪之淆。或爭朝端名節之重。或糾彈巨奸於氣燄方張之日。或牴牾近習於威權思竊之時。一腔忠愛。天日共鑒。偶經摧折。便作逐臣。雖盛世

原無棄人。何官不可自效。然使之迴翔中外。何如特加環召。錫復原職之大快人心乎。奉旨下部察覈。於是原降用李靖等凡十人。俱准復給事。御史云。

張公在言路。頗著蹇諤聲。後官闕。撫遇變。不屈蹈海。從王全節而死。事另有記。

三月。召對考選諸臣於中左門。問解圍急著。中原禦賊何策。兵至之處。作何轉輸。災荒之民。作何生聚。足食足兵。何以使民生不困。議蠲議緩。何以使國用仍充。其各悉心條奏。時行取各官待命闕下。皆仰祈宜興。援引適漕運愆期。宜興因請速行。連下諸科道命使之分頭催儻。於是考選四十四人。朱徽馬嘉植等咸



原評大約出陽羨景

原評慶國遊戶垣

授科道無改部曹者內惟劉熙祚以巡按河南為賊所執不屈死時姜埰在諫垣直言著節幾斃詔獄此外無一人足副特恩者禮科倪仁禎疏言臣等初授科例於朝房候見閣臣謝陞言及兵餉事忽曰皇上惟自用聰明以察為明致天下俱壞陞居位輔弼敢歸罪天子如此吏科朱徽廖國遴亦劾奏同之上怒下廷臣議處命削籍為民陞先任冢宰與唐世濟合謀存逆案霍維華世濟下獄陞間住惟嘉罷後以南京右都御史莊欽隣為冢宰久不到任奉旨詰責調用復召陞為之庚辰冬同陳演入閣聖眷頗隆次年辛巳上命追寫孝純皇后同孝元皇后光宗皇帝御容一同迎入上親致祭諸閣臣陪祭陞獨後至臺省

參之陞疏辨謂臣將出門而衣帶忽斷再續再斷以是後期乞提裁衣者同班役下法司訊鞫雖奉旨免究而上意已動至是遂罷斥夫以大臣而委罪下役其作事之乖亦見一班矣陞後降清仍為大學士

御史徐殿臣劉之勃各疏糾輔臣魏照乘得旨准其請告魏初與韓城善每稟擬輒效其深文駁摘宜興入後諸輔請教唯謹魏尚行自如宜興心不然至是糾疏入方一疏引疾即票旨允歸未幾費縣江縣亦相繼予告去

起陞馬士英兵部右侍郎兼都察院僉都御史總督廬鳳等處軍務馬前任宣府巡撫為總監王坤參其支用庫銀事逮問遣

原評據黃鼎知非錄  
士英以己卯七月任鳳督  
事敘次頗詳是時宜  
興方家居每緣參議  
帷幄也論其因謂為  
阮懷宣化身恐未的



又一黑筆駁前評云  
今按按寇紀略國權  
祿書士英之任風皆  
實壬午五月事家有  
吏部起廢冊其時為  
壬午正月士英猶然滴  
籍也蓋紀述家之外  
深以此

成馬本貴州人久僑居金陵與東南諸紳往來頗善至是以流  
賊橫行江北會推鳳督列名其中上頗怒謂會推大典輒用廢  
棄冢臣欺蔽殊甚宜興奏曰冢臣豈敢欺實以士英曾歷邊疆  
有才可惜今止開列候皇上裁用惟是不先奏明為有罪耳上  
怒始霽曰馬士英既有邊才即著他去以此起官馴至有南渡  
之柄用矣

上以寇氛未靖民罹鋒刃建齊南城每子刻同中官往誦佛經  
移時然後還內禮科姜埰疏言宗社之安危非佛氏之能禍福  
也以九重之尊對西竺之繁文臣不敢以為可且正德年之往  
事皇上豈不見及此耶御史廖惟義疏請驅真人羽士各還原

籍侍郎王錫袞請遣真人張應京歸皆不報先是召應京入都  
即傳禮部宴待部奏會典宴法王在大慈恩寺則宴真人宜在  
宮觀上遲回久之始報可旋召應京至會極門賜齋甚渥比洪  
熙時所賜逾數十倍諸司無敢執奏者已加王錫袞服俸一級  
嘉其諷上事佛寓規於愛也

宮中舊規上每年冬底書符召仙或召將叩以來歲事無不應  
者至是年召之不至良久玄帝下臨批云天將皆已降生人  
間無可應召者上再拜叩問天將降生意欲何為尚有未降生  
者否批答云惟漢壽亭侯受明厚恩不肯降生餘無在者言畢  
寂然再叩不應矣



六月十九日。上召會推諸臣。吏尚李日宣。禮尚林欲楫。左都王道直。禮侍王錫衮。蔣德璟。左副都房可壯。掌正詹李紹賢。兵侍吳牲。刑侍惠世揚。徐石麟。工侍宋政。詹事黃景昉。丘瑜。通政使沈惟炳。大理卿張三謨。諭德楊觀光。共十六人。來中左門。徐以病不至。同輔臣賜飯畢。先召諸輔臣入德政殿。賜坐。次輔賀逢聖。時已奉旨允放。猶被召入。見忽放聲大哭不止。久之。召兵部詢邊事。又召日宣。道直入。頃之。卿二人不須召對。諭俱令出。上遂移駕至中極殿。輔臣亦入殿留坐。賀復放聲大哭。拜跪數十不止。命之出殿。行五拜三叩頭禮。辭朝。復大哭不止。見者怪之。既出。方召預推諸臣入。行禮畢。令入殿內。依班魚貫立御牀東上。

曰。逆口未滅。流寇猖獗。天變民窮。卿等有何嘉猷。奏來。即令各依會推次序。過奏。奏對畢。殿內先備酒六卓。將賜諸臣坐宴。而房宋張三人奏對不稱旨。上遽傳令各回衙門。遂俱出。是夜傳旨。命德璟景昉牲三人入閣。而以濫推多人。責吏部回話。

賀公居身清正。不和於時。故再召未久。旋即告歸。家居武昌。十六年。獻寇破城。全家殉難。大節凜然。此時陛辭痛哭。豈非憂國憂君。明知禍敗之將至。有不能言不忍言者。耶。同輩泄泄者。流或反以怪異目之矣。噫。

二十一日。上召府部九卿。科道入弘政門。賜飯。上御中左門。皇太子定王永王左右侍立。各官行一拜三叩頭禮。朝東宮。亦一



拜三叩頭朝二王一拜一叩頭上服黃袍東宮二王俱服紅袍  
上喚吏部尚書李日宣其聲頗厲次喚吏科都章正宸河南道  
張瑄副都御史房可壯工部侍郎宋玫大理卿張三謨各下跪  
上曰枚卜大典如何濫推許多如房可壯等三人果堪推舉麼  
責令回話尚是支吾日宣奏從不敢徇私上曰前爾奏當秉公  
執法惟知有君父不知有私交知有國法不知有情面你那一  
件不是情面朕數次優容全然不悛正宸奏日宣素是游移臣  
前有公疏糾他此番實不敢徇私日宣奏可壯素有丰采宋玫  
年少向學三謨亦曾掌河南道過上怒曰住了錦衣衛通着拿  
了王錫衮著改吏部侍郎署印日宣等六人俱去冠拿出天怒

方震諸臣相顧失色景昉牲跪辭新命因奏臣等亦在會推中  
諸臣既有罪臣等豈能自安上曰已有旨了輔臣奏枚卜大典  
尚望聖慈寬宥左都王道直奏頃會推俱是冢臣與科道商確  
臣不敢置一語上諭此後枚卜只用翰林間推一二人不許多  
推旋令各賜茶品訖明日有旨下六人刑部問日宣等三人成  
遣可壯等三人削籍又以議罪不當罷刑部侍郎惠世揚或謂  
初次不與推者流言入內及再推又有不與者陰行中傷復有  
二十四氣之目徑達御前皆以小人傾陷故致上怒如此  
增鄉試解額北直生員十名監生七名南直生員十名監生五  
名浙江江西福建湖廣各十名山東山西河南陝西四川各八



名、廣東西六名、雲貴各二名、獨河南以寇亂停試、至次年春始補。何瑞徵、朱統鈔、主考南北、公行賄賣、以關節中者、居其大半。時有對云、不用孔子、不用孟子、只取公子、不要古文、不要今文、只取真紋、吳郡有捲堂文、又有成四書成語編文、悉快人口。起孫傳庭為兵部侍郎、兼都察院僉都御史、總督陝西軍務、勦寇、傳廷至西安、檄召諸將聽令、各以兵來會、既集、乃縛賀人龍責之曰、爾奉命入川討寇、開縣譟歸、猛帥以孤軍失利、獻賊出柙、職爾之由、爾為大帥、遇寇先潰、致秦督秦撫命賊子手一死、不足塞責也。遂正法軍前。諸將莫不動色。因以人龍兵分隸諸將、刻期進討。人龍米脂人、初以諸生劾用、佐督撫討賊有功、總

全陝西兵、降賊多歸之。人龍推誠以待、往、得其死力。襄城之役、朝廷疑人龍與賊通、密勅傳庭殺之。賊聞人龍死、酌酒相慶曰、賀瘋子死、取關中如拾芥矣。

命侯恂以兵部侍郎總督、援勦兵討賊、與孫傳庭協力、援開封。七月、賊圍開封久、先召總兵許定國、以山西兵援之、兵潰于覃懷。時督師丁啟睿、保督楊文岳、合左良玉、虎大威、楊國政、方國安、諸軍、次於朱仙鎮、與賊壘相望。啟睿督諸軍進、勦良玉曰、賊鋒方銳、未可擊也。啟睿曰、汴圍已急、豈能持久、必擊之。諸將請詰朝戰。良玉以其兵南走襄陽。諸軍相次而退、營亂。啟睿文岳聯騎奔汝甯。賊渡河逐之、追奔四百里、喪兵馬數萬。初、啟睿印



劍俱失事聞建啟睿下獄文岳革職聽勘後閏十一月賊犯汝甯文岳以兵救之不克城破賊執文岳及分巡僉事王世琮殺之世琮屢卻賊有功賊射矢貫耳不動號王鉄耳

賊久圍開封城中食盡人相食周主先後捐庫金百二十萬復捐歲祿萬石以養國廩空虛宮人咸有饑色城北十里枕黃河巡撫高名衡推官黃澍等守且不支恃引河水環濠以自固更決隄灌賊可潰也九月河決賊先營高處然移營不及亦沈其卒萬人河流直衝汴城勢如山岳自北門入穿東南門出流入渦水水驟長二丈士民溺死數十萬巡撫各官咸乘小舟至城頭周王府第已沒從後山逸出西城樓率諸王及宮眷露棲城

上雨中七日督師侯恂以舟師迎王及巡撫推官黃澍從王乘城夜渡達隄口諸軍列營朱家寨賊乘高據筏以矢石擊汴城北渡者城中遺民尚存數萬賊浮舟入城盡擄以去河北諸軍以大礮擊之奪回子女五千餘人舊河故道清淺不容尺歸德隔斷在河北邳毫以下皆被其災汴城佳麗天下羣寇心豔已久前後三攻之士馬死者無算賊積恨矢必拔久懷灌城之謀顧以子女珍寶山積不忍棄之水族至是河大決百姓生齒盡屬波臣斷垣矗水上數堞隱見而已黃澍以守禦功召對特授御史即發十萬金令澍賫往以三萬賜周王餘分賑宗室及被難饑民



禮部疏題謚典五年一舉今自特賜外不無久停即如詔獄一  
案諸臣慘死者衆而得謚者止楊漣魏大中高攀龍周順昌周  
起元繆昌期六人無容議外其未得謚者則尚有左光斗李應  
昇周宗建等九人今恭繹明綸仰見當時慘死多人若左光斗  
等正在皇上垂憐洞鑒中謹將諸臣本末開列上請上一體加  
恩易名云云奉聖旨易名大典宜核公評所列慘死各官即着  
該部會同詹翰儒臣察明觸奸本末章疏寔據及本官生平品  
行是否允愜逐一核議具奏

按謚典必由部疏請旨俞允然後詹翰諸臣擬議送閣之中  
具揭題奏崇禎初蒲州為政因姚文毅之議先題趙忠毅公

等十二人同難中惟楊忠烈高忠憲魏忠節周忠介與馬績  
經鄒惟璉張國維凌義渠姚思孝諸公催請雖有旨下部終  
束高閣至十一年給諫熊維典特疏舉先公亦奉旨下部部  
不為題覆也宜興再召頗留意此事言路如李清沈胤培戴  
明說諸公極力聳之疏請再三又因同難諸後人之陳乞嚴  
旨催覆時宗伯林欲楫祠司吳康侯于卹忠大典漠不關心  
亦不知諸君子之始末但憑胥吏呈稿至於未謚周繆二公  
為已謚又以不在慘死之列如丁乾學者亦混入焉因奉核  
議實據之旨遂終於見格矣此沈公面語遜之云然弘光時  
復賴李沈二公疏催宗伯管公紹甯疏請乃得全給一代褒



忠之典始大備矣。

八月十九日早朝畢上即登文昭閣。在皇極殿東上步下閣御德政殿召五閣臣言文昭閣兩旁可建直房朕不時召對及講讀偶有疑問先生每往來亦便宋人言親賢士大夫之時多親官官宮妾之時少又問永樂大典及大學用人理財諸臣各有奏對上因言京中宜積貯本色又言屯田也是要緊又言漕運海運諸事黃河一帶修築如何德璟對自董家河起即用加河不用黃河一路較平穩上言京中運糧車戶之苦德璟對車戶腳價原有輕費銀可用這須給發外面百姓尤苦練餉之加須是漸減省上默然翌日命于文昭閣左右各設直房云。

入漳浦修婉而  
別紀載因上言岳飛而  
及此似太不倫矣

八月廿四日講讀畢上召五輔臣入文華後殿手執一本問張溥張采延儒對讀書的好秀才上曰張溥已死張采小官科道官如何說他好延儒對他胸中頗有書會做文章科道官做秀才時見其文章又以其用未竟而惜之上曰亦不免偏延儒曰張溥黃道周皆有些偏只是會讀書所以人惜他上默然德璟曰道周前日蒙放他極感聖恩只是永遠充軍家貧子幼還望天恩赦放上微笑而已延儒曰道周在獄中尚寫許多書即章奏俱是親筆寫的德璟曰道周寫有孝經一百本每本必有一篇文字多是感頌聖恩景昉言皇上表章孝經所以道周寫內有聖德頌極感聖恩演言他事親亦極孝德璟言皇上問知



樂之人即道周便能知樂。姓言道周無不博通且極清苦。德璟言道周子方十歲但得免其永戍便好。延儒言道周也。戍不永戍就是讀書也。還用得上不答但微笑而已。翌日遂奉手勅云。昨先生面奏黃道周清操博學現今戍遠子幼朕心不覺憐憫。彼先偏迂經此一番懲創想亦改悔人才當惜作何赦罪酌用。先生每密奏來奏輔臣具揭奏復即奉御批准赦罪復原官。諭吏兵二部一時臣民無不鼓舞以為聖主轉圜之美而宜興之與言匡君亦其一端也。

七月十八日御日講。論語子罕言節。上召輔臣問。夫子論仁如欲立欲達克己復禮天下歸仁及出門使民等章言仁儘多。何云罕言。延儒對言此即性與天道不可得而聞之意。德璟對聖人未嘗不言只是弟子悟者以為言不悟者以為不言耳。又問命與仁如何分別。德儒對只是一理在天為命在心為仁。又問一日克復天下歸仁便是修己以安百姓意。諸臣言聖見極明徹。延儒言帝王學問只是明德新民。德璟言明德於天下便是天下歸仁。頃之諸臣言及起廢事舉棄廷秀成勇最有清望。上頷之又諭冬祭太廟宜用何時。德璟對會典原無定時。上曰商子丑二時。德璟對古祭禮只言質明厥明似用寅時為要。十月十七日講畢上與閣臣議東宮移宮事出黃匣內欽定官屬條約八款皆御筆也。首款離間親。上因言潛邸孤危情事。



且指誑嚇給誘四字云中難盡言時方有選九嬪之旨又東宮年當選婚故議移居於外然婚尚未選又方在嚴冬德璟因微言天氣寒凍姓即繼之云天氣正寒稍緩如何上曰即俟二三月不妨未幾罷選嬪東宮因亦不遷

皇極門外兩廡四十八間除曠八間寔四十間東二十間為寔錄玉牒諸館及東閣會坐公揖處西二十間上十間為諸王館下十間為會典諸館定王書房在西第六間第五間懸先師畫像四配侍側及永王出閣移定王於第四間永王於第六間王初出向先師四拜三叩頭以後一拜三叩頭第三間第七間為二王退居處餘三間則大璫內閣講官會集處也定王中宮東

周后出辛巳受封年方十歲壬午正月出閣永王東宮田妃出壬午受封年亦十歲癸未八月出閣皆命選新進士為簡討助教等官為待詔充講讀以兩房兩殿中書充侍書故事初開館內閣連到三日提調講讀以後不復到上愛諸王令隔一日則輪一閣臣提調初開講行四拜禮以後一拜不叩頭讀四書經各五遍講四書書經各二遍用酒飯畢再入侍王寫做閣臣臣至案前觀王親寫十字餘俟諸臣退後寫足送閣中批園進呈御覽

十月初二日詔誅兵部尚書陳新甲起家乙科由邊道陞巡撫丁憂楊嗣昌薦其才奪情起宣大總督嗣昌入閣從任中



樞者為傳宗龍、既得罪遂陞新甲為大司馬附嗣昌力主款議當張若麒督戰敗逃後特遣馬紹愉往義州議款竟得媾書紹愉幾被殺匍匐歸臺省惡其辱國交章發新甲奸狀上雖怒隱忍未即發適新甲有疏細陳款事中多援引聖諭此疏誤為書役發科抄傳兵科據疏糾參上意新甲見責嚴旨切責回話新甲回奏絕不引罪反自詡其功有某事人以為功而寔臣之大罪等語上大怒着刑部提問部引失陷城寨律秋後處決左右有為營解者以虜未薄城為言上曰辱僇我七親藩不更甚薄城乎下部再議司寇徐石麒因言新甲陷邊城四陷腹城七十二陷親藩七此從來失事未有之奇禍亦刑書所不忍

載之條例者也當臨敵缺乏不依期進兵策應因而失悞軍机者斬決不待時旨下即會官處決

左都御史劉宗周到任上言六事一曰建道揆京師首善之地先臣馮從吾立首善書院請復之以昭聖明致治之本一曰貞法守高皇帝焚錦衣刑具一切獄詞專聽法司不必下錦衣并請罷東廠緝事一曰崇國體大臣自三品而上犯罪者宜令凡卿科道會詳之乃付司寇、擬辟乃得收繫此于僇辱之中不忘禮遇之意一曰清伏奸凡禁地區名文書一切立毀一曰懲官邪京師士大夫與外官交際愈多愈巧彈亥之後惟祈嚴斷一曰飭吏治、之敗無如催科火耗詞訟贖錢已復為常



例矣。朝廷頒一令，一令即為輿躡之始。地方有一事，一事即為科斂之籍。至於營陞謝荐，巡方尤甚。請以風憲受賄之律為科道考核之第一義。上嘉納之。未幾有武英殿中書王育民，謁宗周於私寓，出員外郎孫順所餽金。宗周自劾，逮育民。順刑部部究問。

贈故輔臣文震孟禮部尚書詹事姚希孟禮部右侍郎各廕一子入監，給與應得祭葬。震孟以日講受知，特簡入閣。為溫體仁構誣，疏參間住。亡後溫又在事，撫按不敢具題。戊寅年吏科吳麟徵有疏言之，韓城擬票。卹典出自朝廷，何得徇私市恩。御筆抹去。止票該部知道。希孟以鄉闈事謫南。先震孟一月亡。撫按

以舊講官例為之疏，請部覆如例。議卹時張至發當國，票旨以駢語四六新經申飭。疏語違式，議處撫按部科各官，而寢其所請。至是已越四年，莫敢言及矣。宜興當國方博採公論，以收輿望。遂從部覆，得如例子。卹云。

十月初八日，北兵大舉分三道從墻子路入。至界嶺青山即破遷安三河通州薊州等處，已分道一往直定一往河間一往香河。又分別部破臨清等處。

抵山東兗州破之

執魯王索金，王不勝辱，自縊死。信陽王及監軍道于維新、知府鄧藩、錫推官李昌期、滋陽知縣郝魯聲、副將丁文明俱死之。又破萊陽鄉紳侍郎宋政、吏部員外宋應亨、中書趙士驥俱被執。



不屈死事聞上素服御中左門召百官戒諭數百言猶深自引  
咎諸臣皆叩頭謝罪次日下詔罪已曰比者災傷頻仍干戈擾  
攘興思禍變罪在朕躬勿敢自寬敬於宮中默告上帝修者戴  
罪視事勳戚文武諸司等官有奏事者赴弘政門報名候旨召蓋  
自十月至次年四月北兵方始出口所破城邑自薊通等處直  
至山東一省無不被蹂躪者已已以來四次警變未有甚於此  
番者也

行人司副熊開元因見上罪已求言詔即疏求獨對上因召入  
德政殿開元請屏輔臣退然後有言上曰輔臣原管密勿可以不  
退開元奏皇上聖不自聖求賢自輔使大臣皆以皇上之方

寸為方寸天下太平矣又奏見賢焉然後用之等語上曰見字  
最重要見如何是賢開元奏庸人在高位相繼為奸迨言官發  
其罪而誅之所敗壞已不可救上云多事之秋責備人主責備  
輔臣是大題目又云軍興旁午多有小人挾私罔上爾必有私  
意開元奏臣如有私乞敕輔臣面奏上因令補本言昔日輔臣  
繁刑重斂屏棄忠良故人得而攻之今日輔臣奉行德意釋累  
蠲逋起廢賢才皆其所引用偶有不平私相慨嘆而已孰復起  
而攻之若皇上不加體察一時將吏狃于賄賂雖失地喪師皆  
得無罪誰復為皇上捐軀報國者疏入上大怒批旨以其讒譖  
輔弼狡托機密着錦衣衛拿問



給事中姜埰疏言皇上修省罪已于言官諄諄致戒豈有厭薄之心哉言官持論太急亡當聖心此言官之過也聖諭所云代人規卸為人出脫者皇上何所見而云然乎於章奏知之乎抑出於聖心之懸揣乎今如二十四氣之蜚語必大奸巨慝惡言官之不利于已而無以中之不激皇上之怒不能箝言官之口人將爭效寒蟬誰復為皇上言之者時有投匿名文書詆各臣為二十四氣者故埰疏及之上大怒命送錦衣衛打問與開元元同日下獄已而以廷臣赦重下嚴旨并責錦衣溺職着再行嚴訊打問再四讞上下刑部議罪司寇徐石麒議坐二人配贖聖旨以不具招罪司官石麒間住該司劉沂春革職開元埰各始各允遣戍放歸

廷杖一百仍發刑部議罪再問再駁係獄年餘至十七年二月始各允遣戍放歸

熊公自序略云二十九日召對既罪劉宗周等獨諭金吾駱養性曰熊開元必有主使不行拷訊是汝不思駱出方沉吟道上中使忽以手勅至則令取開元埰畢命以病聞密詔也駱失色語同列曰是何可殺璫黨亂政時田爾耕斃諸言者足鑒矣明日十二月朔取開元百端拷掠求主者但舉一腔忠憤及姻朋輩私相感嘆挽開元勿語者以對先一棧一百敲又一夾打五十損掠至垂斃始還獄初二日又一夾打五十損復去衣打四十棍自分死矣金吾法已窮思之三



原評鼎革後魚山  
削髮為僧六極不  
堪

日似有鬼神之通乃以所無大碍于首輔者為一紙開元所  
供媿千言為一紙同進并繳前密諭曰誠如聖諭天下祇  
畏臣衙門之刑不畏朝廷之法合無將開元發部擬罪肆諸  
市朝始可昭垂後世初四日上以讞詞發閣延儒叩首曰  
熊開元南人不任刑今已至矣願付刑曹上用其言下部且  
手詔答金吾曰開元塚前詔不必行始驚且喜呼聖明也刑  
部疏上以不審不招為欺藐玩狗責堂司官開元塚各杖一  
百開元已抵夜臺再四稍有人心莫不淚落而科臣廖國遴  
語同曹良直以緩死之故良直故疏言金吾漏泄机密歸功  
功于已歸過于君毒哉此舉雖磔金吾不足贖罪何況開元

上忽召金吾諭曰外廷有人言汝金吾曰不識言臣何事上  
曰言熊開元事汝漏泄机密金吾曰臣甯不明利害何敢泄  
漏且臣西班不與東班往還何處漏泄但開元屬臣問姜塚  
屬鎮撫司問臣奉詔不得不聞于該司吳邦輔：弟邦臣  
見官御史或與邦臣商遂聞於外歟上曰朕今亦不究矣嗟  
乎人皆一死開元獨千百死非至尊弘宥能免茲辣手乎

閏十一月二十九日召對百官議督撫去留事畢諭科道官來  
吏科都吳麟徵首為姜塚求寬上曰目今口入已及兩月任其  
焚掠慘不必言時聖容惻然且垂涕言曰朕無面目見尔等爾  
等言官當言的不言二十四氣之說事同匿名屢見章奏不得



不於姜埰疏上一問言官為朝廷耳目如已不正何能正人麟  
徵奏熊開元亦以訐奏輔臣得罪諺云家貧思賢妻國亂思良  
相封疆敗壞豈得不責備首輔總是姜埰出語不倫開元亦是  
熱腸上曰開元假托机密陰行譏譖漸不可長前者已明各科  
道俱有奏對言督撫封疆諸事御史楊若橋舉西洋人湯若望  
製火炮禦敵左都劉宗周奏國之大事以仁義為本若望向來  
創說邪教堂中國若用其小技以禦敵豈不貽笑上曰火器  
是中國長技若望比不得外夷宗周奏若望小技何益成敗目  
今要慎選督撫若文官不要錢武官不怕死何愁不太平只說  
選才望不論操守使貪使詐貽禍不小因言范志完操守不好

貪剋冒兵以致軍心渙散又奏朝廷待言官當有體即有罪乞  
下法司今熊開元姜埰因言下詔獄大于國體有傷又言臣宗  
周前亦因言得罪荷皇上優容臣何幸而遇上恩二臣何不幸  
而不蒙寬宥又如黃道周言語激烈有朋友不能堪者皇上既  
待以不死又蒙起廢二臣慙真不如道周何幸而遇恩二  
臣何不幸而不蒙寬宥上曰三法司錦衣衛俱是朝廷衙門你  
說待言官有體假使貪贓壞法欺君罔上通不該問了宗周伏  
地引罪上曰黃道周聞他有學有守用係特恩怎得引他比例  
似你愎拗偏迂成何都察院卿等起來劉宗周侯旨處分輔臣  
同出班跪為宗周求寬禮部林欲楫刑部尚徐石麟工尚范景文



兵尚張國維兵侍馮元颺亦皆跪求上曰熊開元這疏定有主使想是劉宗周主使了僉都金光宸奏定周賦性硜直客也不會與開元不相往來臣與同官極知他在衙門百事整頓老成可念上曰金光宸也着議處已五府勳臣同出班跪求寬宥上曰面諭甚明卿等不必申救宗周光宸先出候旨諸臣各退上召輔臣再入隨傳旨劉宗周革職刑部議罪閣臣持不發將原旨同捧至御前跪奏力救首輔延儒言之甚緩上不許德璟奏昔唐太宗惡魏徵直諫幾欲殺他入宮尚言須殺此田舍翁皇后具服稱賀曰君仁則臣直語未畢上遽曰唐太宗我所不如若閨門德朕亦不學他德璟奏皇上是堯舜安肯學唐太宗

只唐太宗巧於取名上曰如何巧於取名德璟對人臣敢言的用之則名在人主罪之則名在臣下太宗本不喜魏徵故優容他以自成其名上意頗回諸輔臣復緩救之上舉筆抹去刑部議罪四字

冢宰鄭三俊上直言可惜疏曰劉宗周與臣出處略同迂愚每足賈罪于明時拙誠亦恆見原于君父昔年罷棄分正首丘今春起廢忽動聖懷其特達蒙知一也自入朝端獨行跼步華年茂質者相率視為朽人同流合汚者又爭目為怪物羣猜滿庭冰炭難入其憂讒畏譏又一也司寇徐石麒疏曰魯論古者民有三疾之中矜愚居二矜者不必皆廉者必矜愚者不



必皆直直者必愚故孔子思之今劉宗周兼有此二者其於愚  
可厭其廉直可思皇上欲求變通趨時之臣舉朝不乏若欲求  
廉頑立懦維風易俗之臣舍宗周無與歸矣及今用之猶可收  
其後効自茲以往耄矣已矣欲再見此正襟危度岩々冷々之  
老臣不可得矣時又有舉人祝淵上疏請用宗周命下刑部議  
罪

副院張瑋疏參極貪御史王志舉前按蘇松惟賍贖是求郡縣  
伺富民緣飾賍款以供其意每一訪犯贖積盈千讞上又加五  
六百兩不等京師紬舖多本地巨商召各商寫會票十餘萬金  
不脛而走其家復捆載輜重揚々入都至今數其婪橫之迹猶

人々切齒又舉極廉御史成勇時二人皆以參樞輔得罪然立  
身既殊起會各別在勇直抒所見可謂拂士之科志舉自知公  
論不容止如奸人之蓋醜而已奉旨志舉提問勇部議起用  
十六年癸未正月當大計外吏二月當會試取士以邊警阻隔  
外官入覲與舉人會試者俱不得前乃改五月大計八月會試  
九月廷試屆期欽命井研陳演通州魏藻德為主考官通州係  
庚辰科進士不三年即入閣又越同事三人為副考皆出特簡  
云

三月改禮部郎中吳昌時為吏部文選司郎中昌時好結納宜  
興之再召寔昌時奔走効力居多至是出入幕中與將吏交通

原評曹欽岳先生言  
竹亭初入陽羨特之  
頗不滿其其所擁戴  
在興化也及後公面糾  
首輔自解甚苦此後



探聽閣中消息在外招搖市權而醉心吏部謂誠得一日作吏稱部郎即死可不恨宜興亦欲借此塞其望而遠之及入吏部而愈不可遠先是鄭三俊嘗問徐石麒曰昌時何如人石麒曰君子也蓋畏其機深故譽之三俊不悟往時科道年例在二八月科一人道二人昌時為政特廣其數例轉科臣范士髦等四人入御史陳蓋等八人科道羣起大譁掌科吳麟徵掌道祁彪佳率同官面折之昌時怙過自如科道皆惡之矣又宜興自恃聖眷忽視同官同官咸愠之而罷內揆撤廠衛諸事皆內監所不喜司禮王之心嘗告宜興云我輩才力有限求老先生包容宜興不以為意及以督師出誤信門生范志完之大言一以軍情

委之迄無成功上方時遣人偵候于是左右之譖入而禍不可解矣

上諭內閣楚寇披猖朕當親討次輔吳姓仰體朕意命以原官兼兵部尚書督師勦寇特賜尚方劍以重事權加賜銀蟒等項以示眷禮又給銀五萬兩銀牌銀花等項充犒賞之用

四月上諭首輔周延儒卿以元臣自請行邊星馳就道深可嘉尚特賜軍前賞功銀十萬兩銀幣各項俱全又特賜手諭云卿以原官督師關甯薊密昌宣通津保東一切督撫鎮將主客兵馬并京營兵將悉聽節制重者竟以軍法從事有功的立行陞賞仍着兵科方士亮職方尹民興隨行監紀功罪不特馳報惟



原評興化奉以知兵  
大用奉命督師不能  
自任給諫公言之甚  
詳庶幾紀聞故多飾  
詞

卿股肱元輔方倚賴匡勳不忍暫離左右周召虎奉命專征唐  
裴度朝天奏凱名高青史千古同符指日成功星馳入閣慰朕  
側席位望之意時北兵將出口宜興得諭即行而興化先奉命  
討賊者尚遲回未出旋奉上諭曰輔臣吳姓奉命督師三月以  
來遷延不前將出都門籌畫不固若在行間何以致勝還宜在  
在閣料理不必督師因具疏請罪即奉旨着致仕未幾與宜興  
相繼遣緹騎逮問南兵尚書史可法有疏申救得免死遣戍北  
兵以十月初八日入口由薊通直至山東於三月初入莒州城  
養馬休息京師寂然無警矣四月初一赤羽忽自南來舉朝復  
大驚初五日上御平臺召三閣臣詞氣甚厲云朕欲親征首揆周

跪云願代往上仰面而視搖首不言周起陳演跪云首揆閣務  
殷繁臣可去上搖首如故陳起蔣德璟跪云臣可去上不如前  
蔣起周再跪請行上回顧冷笑曰先生果願往朕在宮中看過  
奇門正在此刻一出朝門直向東門行慎勿轉西知首揆  
寓在西當時

一無料理不得不謝恩而出至齊化門權宿城樓題請隨征官  
及勤王已到四鎮劉澤清唐通周遇吉黃得功初六日至通駐  
扎北返勁兵東起津門西至涿鹿亘三百餘里車載騾駝橫排  
擠擁遠近砲聲日夜不絕首揆在通城與四鎮暨隨征各官一  
無事惟內驚面諭之諄切外驚出口之驕嘶近憂通城之脆  
薄及兵將之寡弱而已五月初六日烽火頓息各處解嚴通



城諸文武再慶太平。越四日還朝。為初十上午。即入文華殿。陛見。上歡迎。親手扶握。慰勞倍至。告假休沐。不允。十五日。賜閣臣羊酒。陳蔣二相疏辭。謂伴食方負慚。遂收成命。首輔亦疏辭。竟同准允。十八日。諭吏禮兵三部。查閣臣視師凱旋優禮之宴。何如隆重。各進兩儀。俱駁。情理未盡。廿三日。傳府部九卿。申刻平臺候旨。接出聖諭。首輔周延儒。朕所敬信。不謂亦有蒙蔽。着議處。逾日。議處疏上。旨下。猶予致仕。賜路費銀百兩。後參疏日甚。向之最相暱者。出詞更毒。如袁彭年之輩。皆各自為地。急自別其非周黨也。蔣拱宸。朋比為奸。一疏參昌時。賍款多寔。七月廿五日。中左門親獻昌時。事詳於後即日遣緹騎逮首揆。十月初八日。

抵京。自疏願戍衝邊。不報。舉朝亦無敢有下援救語者矣。

五月。以倪元璐為戶部尚書。仍兼翰林院學士。故事。浙人不為戶部。又以儒臣改任。皆破格也。上召對面諭。嘉其志念忠誠。才猷敏練。論奏井井有條。又諭曰。帝王用才。致治原只一二人。周之四友。漢之三傑。即太祖所用文臣。亦不過劉宋數人耳。又諭祖制不用浙人為戶部。今用人為急。只得通融。又諭以餉不清。則兵不强。民不安。今以安民為本。元璐曰。臣無能。今皇上必欲臣做。臣有三做。一寔做。與兵部合算。必能準餉。以權兵。因準兵以權餉。一大做。求民間大利大害。一舉興除。不以小生節。徒然報數。一正做。以仁義為根本。禮樂為權輿。政有厲民者。臣



必為民請命。上曰：有學問之言，既受事，與兵部尚書馮元臨商互稽之籍，即請以戶部一司官兼職，方得察核諸鎮將士。有崇明人沈廷揚獻海運策，元璐奏聞，請試行，乃以廟灣舡六隻聽運進月餘，廷揚見元璐，驚曰：我已奏聞，上謂公去矣，何尚在此？廷揚曰：已去來矣，運已至，元璐又驚喜奏聞上，亦喜命酌議，乃議每歲糧船漕與海各相半行焉。至甲申二月，首輔陳演以元璐詞，臣不達錢穀，奏上命罷司農任，仍還講幄。三月之變，從容自縊，死。璐解任後，以吳履中繼之。

五月十六日，上御皇極門，召閣臣及吏戶兵掌印官兵科都給事中過跪，出手勅，欽定督撫去留，云：薊遼只須總督一員，擇敏

練幹才任之。遼撫一員，黎玉田。鎮臣一員，吳三桂專任。關甯勦寇山永撫臣一員，李希沆。照舊鎮臣一員，盧天福。是否堪任，着另推薊密不必分作二鎮，但着順撫三屯鎮官轄，即着王繼謨。唐通料理督師保督，俱不必設。呂大器趙維岳回京，另用保撫徐標新任可用。鎮臣另推通州只設鎮，昭舊以副將統領其餘要害，須派明設信守防，先時有備，不致臨事張皇。時以督撫增設太多，因議裁汰，赫然整頓一新。然總兵贅濫數員，副參以下尤多，皆未及汰，大抵樞輔以此為交結納賄地，雖屢經票擬駁催，亦置之高閣。此邊事敗壞大病根也。

上召保定巡撫徐標大對，標曰：臣自江淮來數千里，見城陷處



固蕩然一空。即有完城。僅餘四壁。蓬蒿雞犬無聲。曾未過一耕者。土地人民。如今有幾。皇上亦何以致治乎。上歎。噓泣下。標又曰。天下以邊疆為門戶。固則堂奧安。其要更莫若修內治。重守令。賢則政簡刑清。而盜自息。上曰。諸臣不實心任事。以至於此。皆朕之罪。標又言。車戰墾田。上善之。標四月己卯受事。辛卯。陞見賜金幣。至是復召。蓋上深憫畿民。欲得其詳也。標在任。能殫力任事。甲申春。大寇臨城。竭節固守。知府丘茂華先已通賊。輸款標。執之下獄。親自登城。畫策守禦。而叛兵劫標殺之。出茂華于獄。遂檄屬縣俱叛于寇。

命孫傳庭特加督師總制。應鳳江。楚豫州。勦寇軍務。兼總督。三部尚書。呂大器。以兵部侍郎總督江楚。應皖等處軍務。各給以行間賞功銀幣等項。差官星夜解至軍前聽用。

懸賞格。擒斬闖賊李自成。賞萬金。爵通侯。擒斬張獻忠。賞五千兩。官一品。世錦衣指揮使。

六月癸亥朔。戮叛帥劉超。劉越。各凌遲。傳首九邊。妻子給付功臣為奴。財產入官。舊制朔望停刑。時以超等拷問垂斃。改初一日辰時祭告。午時獻俘。上御皇極門。兵部行獻俘禮。百官致詞稱賀。超永城人。中河南武。解元。跛而知書。為貴州總兵。坐罪免。後上疏言兵事。中樞陳新甲起為河南總兵。以私怨殺御史魏景琦。舉人喬明楷。生員王奇珍。三家百餘人。遂據城稱叛。巡撫

原評劉超有可死之罪。然係誘降。正法可也。較修何為乎。



王漢奉密旨討之。為兵部所洩。漢率兵至。反為所殺。執永城鄉紳丁魁楚。練國事等。迫令上疏保之。未幾。鳳督馬士英合兵圍討。超困出降。解赴京師。正法。獻俘時。于闕下大聲呼冤枉者。三上不問。

七月初十日。上召三法司錦衣衛刑科掌印官山東武德道僉僉事雷演祚來中左門。命該提范志完門外伺候。先是演祚疏言。志完兩年僉事。遽陟督師。不聞知兵善戰。徒恃行賄躡陞。非有大黨。何以至是。方北兵攻德不下。去陷臨清。越五日而志完始至。聞破景州。懼欲避入德城。臣未之許。乃托德州大紳謝陞陞僑寓詞林。方拱乾晤臣于南城古廟。臣答以援兵非守探之

用。督師非入城之官。不聞薊州之陷。由彝丁內潰乎。此臣目覩最真者也。若夫座師當朝。罔利代庇。玉帶明珠。懸作市賞。撫鎮之囚子。部堂臺省。半屬頤指。氣使之私人。稱功頌德。遍於班聯。君前臣名。通廢常禮。至於中樞主計。惟喜虛文。請餉必餽。常例例。萬金必叩三千。兵部則推陞有估。缺之價。叙功憑孔方為優。一則木則昏貪。聽司官吏胥作弊。一則深損長跪。丐閣部科道免參。虜猖寇獍。惟以添撫添督。却脫諉推。徒為破甑燃灰之巧圖。何有金城棗祗之寔情。上覽疏異之。命舊計臣李待問傳淑訓。樞臣張國維及戶兵科俱議處。志完拿解質完。隨召演祚入京。至是召問。演祚前劾志完縱兵淫掠及金銀托方拱乾行賄。



果否。演祚對如前奏。因召拱乾入。又問演祚稱功頌德。遍于班聯。是指何人。對曰。周延儒招權納賄。如起廢清獄。蠲租俱認為已功。兩次考選。收為門下。凡賈巡撫總兵。必經幕客董心葵之手。又令馮銓之子送物回家。上命立逮心葵。又問志完逗留。淫掠之狀。志完辨無有。且曰。是日臣在大王庄。總兵賈芳名等禦敵。乘大風卻之。上斥其妄。又問吳履中。尔察核志完云何。履中對如演祚言。上曰。趙光忤亦逗留。但參志完。何以服之。命并逮。光忤薛敏中。而拱乾辨無受賄事。上不問。

二十六日。上御中左門。東宮二王左右侍。召三法司等官。及御史蔣拱宸。郎中吳昌時。上問昌時。結交廠衛。存何意見。昌時辨

其無。又問馮銓結親。受其萬金。昌時言行。聘從無萬金之理。又問數款。皆拱宸疏中所參也。昌時一一辨對。不服。上令夾起。將昌時二夾。敲四十槓。斷槓二根。上疑有弊。着錦衣喬可用。門外候旨。昌時暈絕。而蘇。復奏云。五案之大法。失事必誅。行間之功。罪察飾同任。東協失事。拱宸何得免脫。上問拱宸。行間失事情形。拱宸不能答。命并拿下。候旨。隨下諭云。吳昌時大奸巨猾。鄭三俊何以破格錄用。着議處。張國維職任中樞。失事重大。候恂棄汴。不援坐糜糧餉。俱拿解來京究問。郝炯蔣拱宸方士亮尹民興扶同欺飾。并喬可用俱着法司提問。郝蔣以參昌時賍款不實。方尹則先奉命隨輔臣出征者也。



諭吏部朕覽輔臣奏嚴禁寓所通謁其于事關職掌俱于朝房會議或重大機要不妨過東閣密商並不許擅詣私宅投謁送遞私揭犯者緝糾論斬蓋內閣陳演有揭嚴飭往來也說者謂演如此自慎不知日後為閩賊所炙犬多金何來

諭吏部差官召上江漕儲副使方岳貢來京陛見尋以召對稱旨特陞協院左副都未幾即以原官同李建泰入閣辦事從來閣臣無僅帶副都御史銜者三百年來惟岳貢一人而已先一日召對適上詰責吏部某事尚書鄭三俊云臣正行糾駁岳貢貢云何不即行題奏一語深當上意遂得大拜後閩賊破不早引決竟被刑辱而死時有給事中時敏部擬例推金華知府

知府托同鄉求援于方令急具一條陳疏進來敏即具一套疏忽奉嚴旨下部議處眾相訝不解所謂適例推疏上方票旨時敏正當議處何得遽行陞擢員缺另推後議處疏奉旨時敏降三級始舊管事仍嚴然掖垣矣其舞文弄權如此

岳貢以崇禎元年為松江府守歷十四年不遷同時蘇州守守陳洪謐則歷八年不遷皆以錢糧不清降罰至二十餘級級兩人于糧務寔未精明任吏胥耗蠹不能辨也陳過于仁厚然與民休息民皆德之方則惟奉聲氣要津日以詞訟作書帕因得延譽內廷躡位宰輔卒致身名俱敗使不遇國變幾同漢家良二千石並傳矣

原評以不精巧任吏胥若方公則方死且不瞑矣

原評甚確



八月諭刑部瘟疫盛行民間罹災甚慘大小各官都着洗心滌慮共圖挽回獄中情輕罪犯先行釋放候旨事涉矜疑者作速問結未幾上召刑部尚書張忻問曰獄中各犯可盡該放否忻曰此時瘟疫遍行物故者多慘不忍見所以取保放出若失悞封疆者仍禁不放上曰放也罷了各犯就帶方巾穿色衣在外拜客如熊開元姜埰尹民興等這等可惡忻出即拘喚數人還監收禁時京城瘟疫盛行朝病夕逝人々惴恐有全家數十人一夕并命者上特令張真人建醮祈安而終無驗日中鬼出為市店家至有收紙錢者乃各置水一盆于門投銀錢於水以辨真偽民間終夜擊銅鈇器聲以驅厲崇聲達九重上不能禁

景象蕭條識者早知有甲申之禍矣

諭內閣禁奢靡止宴樂前已與先生面諭還宜擬旨通飭朕於元旦冬至春節端陽中秋及諸大典禮陞殿方許作樂其餘皆免朕浣衣減膳已有諭旨今用錫木器以示儉約金銀各器閑典禮者留用餘貯庫以備賞賚内外文武諸臣俱宜省約專力辦賊先生每將先年舊旨再參看議要來行

上性儉約嘗服多用浣衣庚辰秋後以念聖母矢心齋素用湯初係金玉自後止用磁漆器袍服大袖止留尺五寸命閣部大臣亦以尺五寸為則辛巳六月瀛國太夫人徐氏言夢皇太后鑿輿下降笑語如家人請上除弊齋戒日外不妨量進



肉味奉旨。聖母托夢。朕心不勝思慕。除郊廟祭告。遣謁忌辰。朔望仍齋戒外。其餘日用。嘗膳於奉先殿。收回祭器。量用自是始用葷。然每當祭祀。散齋七日。致齋三日。皆出宿文華殿。或武英殿。俟禮畢始回宮云。

十一月 日。刑部奉旨。周延儒機械欺蔽。比匪營私。濫用匪人。封疆貽悞。屢旨已明。所擬豈足蔽辜。姑念一品大臣。着錦衣衛會同法司。于寓所勒令自裁。准其棺斂回籍。先是部院看議云。周延儒召起田間。隆以師保。可稱千古殊遇。受事之初。將順聖明。有蠲租起廢。解網肆赦。諸大政天下想望。太平自宜永矢精白。仰贊宸謨。乃防簡疎。於比匪居身。設于營私。又云。精神慣

用之揣摩伎倆。總歸于閃爍。一時之倖竇日甚。狐假公行。自悞因以悞國。嗟何及矣。以大官受財。枉法律。擬令發烟瘴地方充軍。奉旨勒令自裁。蓋自出聖斷云。

部院看語。略摘數句。實中情罪。受者當以心服。若如流傳種種。至有受賄縱敵之說。夫力能殲敵。方能縱敵。漫坐以莫須有之案。有識者俱不以為然也。

同日奉聖諭。罪督范志完。趙光忤薛敏中。失陷封疆。着即會官處決。吳昌時把持朝政。奸狡百端也。着斬決了。罷吳牲發雲南金齒充軍。

法司看議云。吳昌時遍身鱗甲。轉眼戈矛。生平伎倆。在于依



原評給諫不在垣時  
六丞薦光忤之才

附逢迎晝夜營謀惟是挑搆反覆望門依附則換頭改面  
員身入幕求容則砥痔吮癰而獻媚陽為詭譎反誇作驅除  
奸黨之功明肆傾排偏矜有護翌正大之力投拜罪輔薛國  
觀遂覲覲乎考選串通逆案馮銓而假竊其聲靈舊家臣清  
執之品自昌時入而銓政亂是累冢臣者昌時也舊輔臣柄  
政之時自昌時用而議論煩滋是悞輔臣者亦昌時也數語  
描寫已盡可作昌時小傳也 光忤由兵部任密雲巡撫以  
勅總監鄧光韶謫戍薊日州破日廷臣咸薦其才起任薊遼  
總督竭家資以練兵竟與志完同戮識者寃之

張獻忠既破襄陽後破黃安破黃梅癸未正月破蘄州荆王播

遷兵備許文岐死之遂陷黃州破麻城從島蛋洲渡五月日  
破武昌先是賊至江北省中官府皆泄三無言城守者忽中夜  
有呼於街者曰賊至矣闔城男女驚起狂奔至曉寂然未見有  
賊如是者數夜人皆玩之不以為意及是曉登城望之滿江皆  
賊船矣兵民一時驚潰賊入城盤踞楚王府搜取庫藏及劫掠  
紳民無遺以篋輿籠王沈之江屠戮數萬人驅男女數萬人于  
教場聲言點名衆既集傳令跪上者亂砍跪下者亂箭射死百  
無一存積屍浮江江水為赤其未殺者多刖斷手足鑿毀目鼻  
無一全形獻忠遂僭稱偽號鑄西王之寶稱武昌曰京城偽設  
六部五府開科取士殿試取三十人為進士授郡縣官在城各



原評此又破承天時事

官死難者參將崔文榮與賊格鬪死長史徐學顏為眾賊斷左臂右手持刀不仆賊支解之鄉紳大學士賀逢聖與文榮守德勝門城陷歸家衣冠向北再拜以巨舟載其家出墩子湖鑿舟全家溺死子覲明光明俱夫婦全死逢聖屍沉百七十日不壞至十一月壬子始克斂自此後岳長衡永相繼告陷八月破岳岳州長沙巡按劉熙祚長沙推官蔡道憲俱被執不屈殉義最烈別有詳記同時殉難者又有知縣嘉魚王良鑑鍾祥蕭漢蒲圻曾拭均州胡承熙衡陽張鵬翼興都留守徐壽崇武昌通判李毓經歷任文熙

上聞聞賊在滎汜密禹之間嚴令孫傳庭出關相機掃蕩先是

賊盤踞楚豫間有窺關中逼金陵之意廷議催傳庭進勦傳庭故將家子九邊精銳悉隸麾下又據潼關之險初試小勝遂欲一大創之恃高傑為摧鋒傑不肯用命再三止傳庭勿出秦撫馮師九孔數言頓兵久安非朝廷命戰意也且寇日強橫將何所底傳廷不得已以八月二十日出師逼賊：匿精銳驅殘民誘我屢有斬獲遽以捷聞前行三百餘里賊伏盡起進退失據芻糧不繼兵眾大潰時將士家屬盡在涇原高傑謂潼必不可莫若收合各兵保西安以固根本傳庭不許曰若退則潰不可止不如聲言進戰使賊聞而遁我可待餉賊偵知之明旦挑精騎壓壘我師即奔潰器甲山積騎兵悉退入關步卒後至賊尾

原評考師此戰獲勝而後敗此紀未免太略



原評孫少力戰而死此  
為其實

獲所棄甲仗甚衆乃偽為步卒裝雜入關內伏兵既多炮聲  
一响閉門即開時九月初六日也諸帥倉皇四散西安人王根  
子私降賊縱賊大入道臣楊王休布政陸之祺以下皆降西安  
遂陷傳庭方在關上為所留西番喇嘛僧二百餘擁之西行死  
於亂兵自傳庭死而秦地悉陷遂破榆林入太原直逼  
一時殉難死節者省城則巡撫馮師孔按察司王綱長安知縣  
吳從義渭南知縣楊暄商雒則道臣黃世清蒲城知縣朱一統  
商州鄉官則原任尚書南企仲誥封副都御史朱崇德原任巡  
撫焦源清焦源溥御史王道純參政田時震主事南居業蒲州  
鄉官則副使祝萬齡咸甯舉人朱誼泉中部知縣則朱新趕有

一未配妾亦投繯死都司吏丘從周亦罵賊死

孫公以將種奮跡甲科由知縣陞吏部有吏才崇禎七年任  
陝西巡撫禦賊有功既遷保定總督以同事不相能稱病求  
去言官論其卸責悞事革職下獄張獻忠既降復叛楊嗣昌  
失事自盡傅宗龍汪喬年相繼敗死孫從獄中請討賊自贖  
乃復官總督勦寇初奉密諭賀人龍撫其部衆分將領之  
誓師出關頗有成畫方捷報至京廷臣動色相賀未幾而敗  
報踵至矣考其所由皆馮撫趨之又是時熊給事人霖方奉  
使在秦亦責以奉命討賊宜速進毋退不得已徵倖一出竟  
至於敗嗟乎國之將亡神奪其鑿四路出師決於紅旗之踵

原評是時上皆戰甚  
亟非必馮然誤之也



至松杏敗績成於職方之坐催潼關不守陷於熊馮之讜  
遂至于一敗塗地中原為墟是誰之咎歟然而馮卒能盡職  
熊于國亡之後亦航海全節而死悉可免後人之苛論矣  
自成自初起至是標掠十餘年既席捲楚豫始有大志然地面  
通皆戰場所獲郡縣官軍旋復之既奄有全軍秦百二山河遂  
不可制自成據秦府偽授秦王存樞權將軍世子妃劉氏曰國  
破家亡願求一死自成遣歸外家秦藩富甲天下賊之犯秦也  
也戶部尚書倪元璐奏曰天下諸藩無如秦晉山險用武國也  
宜諭兩藩能任殺賊不妨假之以大將之權如不知兵宜悉輸  
所有與其齎盜何如餉軍賊平之後益封兩藩各一子如新王

例亦足以報之兩王獨不鑒十一宗之禍乎賢王忠而熟于計  
必知所處矣書上不省賊初專事殺掠牛金星勸以不嗜殺于  
是禁戢其下民間安堵遂改西安府為長安府

自潼關既破賊乘勝長驅如入無人之境京師大震廷議以兵  
部侍郎余應桂為總督命御史霍達為監軍十一月初三日上  
召對諭應桂曰逆寇入秦特命前往早平狂寇早安萬民有真  
勤然後有真撫有好將然後有好兵有好有司自然有好百姓  
在爾寔心去做應桂再三稱難言賊已入闕州縣瓦解所發臣  
兵三萬及糧餉尚無實着陝西既為賊所蹂躪本地糧餉如何  
追徵所撥川餉亦隔省為梗上呼戶臣倪元璐問該部何以應



之元璐奏懷慶現貯有餉銀十五萬又司官劉邦弼催到十萬  
又剩有五萬秦中勦餉原額七十餘萬如西安未破憑該督設  
法督催接應應桂奏催餉已難只有山西就近可以接濟元璐  
奏山西近京只有此項可濟邊需不敢輕許上曰也要撥些與  
他應桂奏要幾員好將官上呼署兵部張伯鯨諭宜選兩員與  
他伯鯨奏他討馬岱已推保鎮尤翟文已回止有孫獻捷見在  
在京營應桂奏原任保鎮姜瑄以通賄薊鎮薛敏中以失事二  
人可用上不許着另推呼霍達過命作速前去料理達奏昨  
據按臣金毓峒報孫傳庭不知下落按臣東走撫臣馮師孔西  
走未知存亡如有兵有餉臣不惜一死以報皇上無兵無餉空

死無濟因慟哭伏地上許其熟練地形寔心任事今炤諭內事  
有功破格賞陞上命閣臣擬諭頒給銀幣紵絹各項為犒賞用  
又令御馬監撥馬數十匹與家丁騎坐令兵部速選將官同去  
又命吏部李遇知察邊撫宜易者因議易甘肅巡撫林日瑞云  
時賊已入關方推秦督無肯行者上謂罪廢諸臣原以知兵舉  
何至推督撫便若無人聖意蓋有所指應桂亦其一也部中  
不得已推之然寔非邊料上特賜宴於中左門直房令閣臣侍  
宴應桂得命後日夜悲泣勉出都門則偽官充斥赴任無地矣  
是時朝無確報相率自愚莫有以賊在意者閣中票旨但云  
以匹馬不入為功兵部議兵但云以死報國未聞作何調理



上下相蒙馴至敗亡莫之省也

李自成既破西安遂破延安破鳳翔以達榆林兵備副使都任及總兵王世顯侯世祿侯拱極尤世威惠顯李昌齡尤翟之等歛各堡精銳入鎮城大集將士問之曰若等守乎降乎各言效死無二遂推世威為長主號令繕甲兵賊遣偽官說降不聽賊怒環四面攻之城上強弩疊射殺賊無算賊稍卻已復益兵力攻逾旬不克賊以衝車環城穴之城崩數十丈賊擁入城遂陷都任合室自經死尤世威縱火焚其家百餘口揮刀突戰死諸將各率所部巷戰殺賊千計賊大至殺傷殆盡無一降者合城婦女俱自盡文武將吏以及士民死者數萬人榆林為天下

勁兵處頻年缺餉軍士飢困而殫義殉城志不少挫榆林既屠賊搗甯夏總兵官撫民迎降三邊俱沒賊無後顧長驅而東矣攻慶陽城守不支遂陷執韓王兵備段復興知府董琬鄉紳太常少卿麻僖俱死之已後遣賊陷甘州賊渡河莊浪涼州二衛衛俱降遂圍甘州巡撫甘肅林日瑞已奉旨罷職尚未離任同總兵郭天吉同知藍臺等並以力屈死之居民四萬七千餘人西甯堅守不下至明年二月詐降殺偽官賀錦等

張獻忠既破武昌隨返兵破長沙一路至四川陷涪州瀘州圍佛圖關進圍重慶悉力拒守四日而陷瑞王合宮被難舊撫陳士奇知府王行儉皆死之賊屠重慶取丁莊萬餘剝耳鼻斷右



原評獻忠為  
本朝帝王所破手到之

手驅至各州縣兵至不降者視此為例但能殺王官府吏封府  
庫以待則秋毫無犯由是所至官民自亂無不解甲投降者進  
陷成都蜀王亦宮合被難巡撫龍文光及道府各官皆死之姓  
名不能詳紀所知者惟推宮劉士斗華陽知縣沈雲祚仁壽知  
縣顧繩貽成都知縣吳繼善一一門四十餘口皆同日并命  
為尤慘云獻忠大索全蜀鄉紳至成都皆殺之既而出榜試士  
諸生遠近爭赴獻忠以兵圍之擊殺數千人皆挾紙握筆以死  
蜀中士類俱盡復大殺百姓全蜀數千里蕭條絕無人跡蓋甲  
申年秋冬事也中原多故獻忠遂奄有兩川李自成敗後益發  
兵攻漢中陷之獻忠逡巡自守不敢出來未幾獻忠以病死於  
蜀以養子孫可望嗣領其眾焉

當日破京師弒君后者聞之罪惡寔甚於獻而蹂躪楚蜀殺  
人盈野者獻之暴虐尤甚於聞蓋天實生此二賊以亂天下  
跡其所為固多史冊以來所不經見之事近婁吳梅村先生  
記兩寇始末頗詳茲不具述

上念宣鎮陵京藩屏援勦必先以馬缺發御前銀三萬給鎮臣  
唐鈺令市馬閣臣蔣德璟奏言該鎮買馬額銀兵部歲發不貲  
未見作何收買茲復另發既非例且恐鈺復浪費一擲也上不  
聽未幾大同山海各鎮臣引例討御前銀買馬上思璟言不復  
發鈺以貪淫為宣鎮督王繼謨參提前銀竟不可問



吏部文選司兵部職方司為用人之地歷任正郎多不能副上意因特起原任太常少卿沈自彰以原官管文選事原任四川布政張法孔以太僕少卿管職方事沈係辛丑科由縣令歷任部曹府道以天啟年布政陞常少崇禎元年致仕張係庚戌科由戶部歷任司道丁丑年以四川布政考察革職茲忽以陳方二輔薦特起廢籍改授吏兵司官皆未有之異事也到任未久即遭國變不能殉節為賊夾辱而死

浙粵二鎮缺已一年因營求者多相持久不推有大璫王之心之弟之仁久欲得之兵部堂司引嫌置為緩局以致蜚語上聞特召職方郎王永積入德政殿詰其不推之故永積以邊鎮方急未暇推及內地為對亦實語也上怒鑄其官寔欲出此缺以予新職方也有大力者亦果得二鎮以去

十七年正月大風霾占曰風從乾起主暴兵破城鳳陽地震闖賊李自成稱王於西安僭國號曰順改元永昌以牛金星為偽丞相立六政府尚書等偽官恣掠河東河津稷山滎河絳州一路遣偽牌投於兵部言三月十日至會同館繳兵部執牌者訊之則京師人自涿州還值逆旅客與十金代投以為詐斬之宮中向有密室累朝不開至是上忽欲開視大璫固諫不聽開進見空屋三間中惟小紅箱一隻啟視之有小畫三軸其一畫畫文武百官俱手執朝冠披髮亂走狀上曰此殆言官多法亂



耶其一畫兵將倒戈棄甲窮民襁奔逃狀上曰此是軍民背叛  
叛耶其第三軸止畫有一人短衣跣足披髮中懸儼然御容也  
羣璫相顧失色上為撫然而出吏科吳麟徵疏請棄山海關外  
甯遠前屯二城檄吳三桂入關屯宿近郊以衛京師蓋甯遠在  
關外徒守甚難先年職方趙光忭出關察核已有此疏議者謂  
無放棄地不可今當有警徙三桂精兵入援實要計也上下廷  
臣諭議閣臣謂關門兵未可輕調棄地作何名目持不可且咎  
麟徵言之失乃不果行三月中警報益急兵部亦以為言上獨  
斷其是內閣乃肯行猶請降旨吳三桂問撤兵事如何往返經  
月遂遲師期三桂以二十日抵豐潤京師先以十五日陷矣

罷兵部尚書馮元飈以原任兵部都給事中新陞添設兵部右  
侍郎張縉彥代之仍兼翰林院學士

縉彥初任縣令以禦寇有功考選戶曹以召試改翰林時楊  
嗣昌為樞輔屬其私人沈迅薦縉彥才改授兵科都給事本  
欲收為同黨也縉彥到任即疏參嗣昌且於召對時言之而  
議五案大法一疏尤為嚴切可謂克稱其職矣至是方以科  
臣起復遂超拜佐部即正樞席皆出帝心特簡受事未久忽  
遭大故先既不能畫一策以濟變後復不能拚一死以報國  
南渡之日幸借名以復官鼎革之後又反顏而受職究以飾  
名獲罪禍及身家可不哀哉

原評祖寬等之  
過後功未減此  
大



元颺與其兄元颺同以文章聲氣名振一時推為大小馮云  
颺在諫垣頗多謹論晉任中樞以值時事艱難之秋自知不  
能勝任故托病堅辭幸得卸責歸未幾即以病終颺任天津  
巡撫北都變後潔身言旋未幾相繼齋志而沒識者悲其所  
遇之不幸矣

命免金聲逮問授翰林修撰來京陛見聲初任庶吉士己巳之  
警同劉之綸請纓自効改授御史監軍事平解任養親家居親  
寇警練鄉兵以衛地方鳳督馬士英所募黔兵過徵爭鬪失事  
士英具疏參之奉旨逮問聲亦先具疏辨上察其枉且追念昔  
年舊勞故有是命并諭追卹之綸云聲是時已丁艱未遑赴召

乙酉之變起義不克挺身赴難從容殉節於舊都

正月三十日上召閣臣及吏戶二部臣入文華殿諭吏尚李遇  
知曰廷臣所舉知兵及清官皆當核寔不得濫徇又諭戶部倪  
元璐曰各邊需餉日急目前即要措處百萬元璐言外解未到  
途中梗阻因言浙中東陽土寇之變上曰不必奏即與輔臣商  
議措置因取光時亨疏目閣臣曰先生每票擬須體朕意這票  
內聚斂小人是何人閣臣蔣德璟對曰即是係練餉部科上曰  
部科何人璟曰原任戶部尚書李待問科臣偶記不真上曰朕  
如何是聚斂當時只欲練兵璟曰既有舊餉五百萬新餉九百  
餘萬復增出練餉七百十三萬當時部科寔不得辭其責且所



練兵馬今皆安在上曰倪元璐已并三餉為一了璟曰戶部雖并三餉為一州縣追徵只是三餉上怒曰前票孫晉本既是狗縱這光時亨本內所參何人並不明言這等票擬顯是朋黨璟奏臣孤踪獨立與二臣並無一面一向在御前說練餉當蠲聚斂之非不是今日方說諸輔臣同李遇知倪元璐皆為求寬倪止以鈔餉係戶部職掌自引咎上曰起來諸臣承旨退後璟具揭待罪奉御批朕知道了而餉鈔法已停免練餉亦議裁矣璟連疏求罷至三月初二日始得旨允放仍賜銀幣乘傳云先時有建議行鈔法者鈔背書寫行使姓名五年填滿繳換上以堂印鈐之命侍郎督寶鈔書提舉司閣中票擬屢不合旨上手官

中傳鈔式令鑄印二面相連又改五年為四年云

命大學士李建泰出師勦寇二十六日行遣將禮命駙馬都尉萬煒以特牲告太廟上親御正陽門授建泰節劍備法駕警蹕蹕賜宴餞之五府掌印侯伯內閣六部都察院掌印官及京營總協侍立鴻臚贊禮御史糾儀大漢將軍侍衛設宴作樂上親賜建泰御酒三杯即以杯賜之慰諭再三曰先生此去如朕親行令內璫為之掛紅簷花鼓樂導尚方劍而出上目送之又賜手敕有願卿早蕩寇氛旋師奏凱封侯進爵鼎彝勒銘語官軍旗番十餘條萬自午門排列至正陽門旌旗金鼓甚盛建泰奉御肩輿行不數武損折識者知為不祥是日大風沙占曰不



原評建泰西行年錄  
左次東光也  
崇崇祿遺錄大興王  
世世所探出之建泰  
次東光

利行師授進士凌駟職方主事隨輔臣監軍赦李政修罪軍前  
効用以郭中傑為副總兵充中軍旗鼓西洋人湯若望隨行修  
火攻水利建泰出都道聞山西烽火甚急因遲其行日三十里  
師次涿州營兵逃歸者三千人次東光紳衿城守不納留攻三  
日破之答知縣張弘基殺鄉紳王佐是日即移師出城初建泰  
承上寵命恃有家財可佐軍需後聞家已破進退失措有遠巡  
畿內而已

二十九日上傳命工部尚書范景文禮部侍郎丘瑜俱以原官  
入閣辦事後城破上崩閣臣中從死者惟景文一人不然黃扉  
一席地盡作南寇楚囚矣

李自成陷蒲州及汾州遂以二月初五日薄太原山西巡撫蔡  
懋德遣牙將牛勇朱孔訓出戰孔訓傷於砲牛勇陷陣死一軍  
皆沒城中奪氣困守兩晝夜初七夜風霾大作初八辰刻風愈  
烈飛沙揚塵賊乘風緣梯而入城遂陷懋德先已知不為手寫  
遺疏付監紀賈士璋曰君將此疏上聞俾朝廷知今日尚有不  
逃不降從容死節之臣也時緊隨惟中軍應時盛：先謂妻  
孥曰外無救內難守撫院忠義自矢吾自誓必相從汝輩不若  
從吾皆為厲鬼毋為賊辱也先將妻妾及一子手刃之次日同  
撫院被執不屈罵賊而死同死者布政趙建極守道毛文炳而  
下共四十六人姓名俱未詳賊破太原後遂至忻州攻代州薄甯武

原評俱自縊而死



關總兵周遇吉悉力拒守殺賊萬餘或言賊勢重可欵也遇吉曰戰三日已殺萬賊能勝之一軍盡為忠義萬一不支縛我以獻若輩可無恙于是衆心益固會兵少食盡不敵而敗城破猶揮刀力鬪被執磔死遂屠甯武賊遂移檄遠近有云君非甚閻孤立而煬蔽恆多臣盡行死私比黨而公忠絕少甚至賄通官府朝廷之威福日移利入戚紳閭左之脂膏盡竭又云公侯皆食肉紈袴而倚為腹心宦官悉齷糠犬豚而借其耳目獄囚累士無報禮之心征斂重民有偕亡之恨人讀之無不扼腕憤恨者

上下罪已詔曰朕嗣守鴻緒十有七年深念上帝陟降之威祖宗付託之重宵旦兢惕罔敢怠荒乃者災害頻仍流氛日熾忘累世養養肆廿載凶殘赦之益驕撫而輒叛甚有受其煽惑頓忘敵愾者朕為民父母不得而卵翼之民為朕赤子不得而懷保之坐令秦豫丘墟江楚腥穢罪非朕躬誰任其咎所以使民罹鋒鏑蹈水火殄量以罄骸積成丘者皆朕之過也使民輸芻輓粟居送行齋加賦多無藝之征預徵有稱貸之過者又朕之過也使民室無懸磬由卒污萊望烟火而無門號冷風而絕命者又朕之過也使民日夜告凶旱潦洊至師旅無處疫厲為災上千天地之和下叢室家之怨者又朕之過也至於任大臣而不法用小臣而不廉言官首鼠而議不清武將驕懦而功不奏



皆由朕撫失道御誠感未孚中夜以思跼蹐無地朕自今痛加創  
創艾深省夙愆要在惜人才以培元氣守舊制以息煩囂行不  
忍之政以收人心蠲額外之科以省民力至於廢罪諸臣有公  
忠正直廉潔幹才尚堪用者不拘文武吏兵二部確核推用草  
澤豪傑有恢復一郡一邑者分官世襲功等開疆即陷沒脅從  
之流能舍逆返正率衆來歸許赦罪立功能擒斬闖獻仍予通  
侯之賞於戲忠君愛國人有同心雪恥除逆誰無公憤尚懷祖  
宗之厚澤助成底定之大功思克厥愆歷告朕意

吏部奏大寇就擒奉旨陳子龍定變可嘉着授兵科給事中先  
是東陽之變寔推許都為主都故任俠好義遠近信服邑令姚  
孫渠貪虐殘民借名備亂橫派士民輸金而坐都以萬計都寔  
中人產勉輸數百自詣告減因有忤言適有奸民假中璫名招  
兵者於都無涉也事發文致之又摘其所刻社稿姓字謂是結  
黨謀叛會都葬母賓客咸集負氣者互煽之因發憤舉兵以誅  
貪吏為名民怨毒已深旬日之間遂聚衆數萬掠東陽義烏浦  
江三邑巡按左光先聞變即調兵行勦民各保寨拒敵官兵大  
敗子龍時為紹興推官命之監軍子龍謂都寔非反不過為貪  
令所激耳令親信齎書往諭都即率其同事十三人解甲投降  
子龍為之請命光先皆不許悉斬之餘黨盡散浙亂以平子龍  
向以文章名世南渡時為諫官有聲國變之後謀起大義不克



而死

出原任兵部尚書張國維於獄召對中左門命以原官督浙直兵餉國維拜命後知賊信漸迫星夜率數騎南行得不及於難吏科馬嘉植韓如愈等亦借催銀等差連轡而南至山東如愈為劉澤清差兵殺死于道

國維本浙人在諫垣時能不附同鄉烏程之黨然亦不為崕異故烏程容之鎮撫蘇松歷七年之久雖無大功績而與民休息民頗頌之至中樞重任本不能勝况值時事多艱前人敗壞之後耶非特科道交章論列有曰深揖打恭便成職業亦略大而忽細也弘光時再任戎政與馬阮不合先幾乞身

身人謂其愚不可及南都既覆錢塘畫守卒能竭力盡節一死以畢其事噫亦可以傳矣

召對文華殿上向左都御史李邦華密奏內云輔臣知而未敢言其試問之語指詢何事輔臣陳演對中允李明睿疏及少詹項煜議單上即簡閱默然蔣德璟奏廷議俱言東宮宜往南京監國上不應次日給事中光時亨即疏參李明睿南遷為邪說明睿疏辨上即召光時亨面詰曰一樣邪說卻只參李明睿何也顯是朋黨姑且不究又曰諸臣平日所言若何今國事至此無一忠臣義士為朝廷分憂其所謀乃若此耶至三月初四日召對復諭閣臣曰督輔李建泰有疏勸朕南遷國君死社稷朕



將何往。大學士范景文左都李邦華襄城伯李國禎請先奉太子撫軍江南。光時亨曰：奉太子往南，諸臣意欲何為？將欲為唐肅宗靈武故事乎？景文等遂不敢言。上復問戰守策，眾皆默然。上嘆曰：朕非亡國之君，諸臣皆亡國之臣也。遂拂衣起。

嗚乎！遷國圖存，古人有行之者。至于東宮撫軍，雖屬權宜，寔為要計。但遷亦何易言。斯時賊鋒已蔓齊魯，南北聲息中斷，出國門能一往無咎哉！上之英明，早已見及。故屢次召對，環顧無人，不禁傍徨慨嘆。耳聞曾私語首輔，演曰：凡事要先生一擔，演默不答。既復有朕要做先生，偏不要做之語。上意可知。已此時計復何之？惟有斷然守君死社稷之意為正矣。悲。

哉！朕非亡國之君，諸臣皆亡國之臣之語也。此真千古至恨，豈直遺民私痛已哉！

詔封各總兵：吳三桂平西伯，左良玉甯南伯，唐通定西伯，黃得功靖南伯，劉澤清實陞一級，劉良佐高傑馬岱岳馬科姜瓖孔希貴黃斐葛汝芝高第許定國王，乘胤劉芳名李棲鳳曹友義杜允登趙光遠卜從吉楊御蕃等，各陞署一級。各督撫亦分別加陞。始徵吳三桂王永吉率兵入衛，又召唐通劉澤清入澤清前，命移鎮彰德。因縱兵劫掠臨清，南奔通以八千人入壁齊化門外。陛見上，慰勞倍至。尋出內帑十萬命太監杜之秩監其軍。通倨傲甚，謂上大帥，我又以內臣節制我，是我不敵一奴才也。



隨奏兵寡賊衆不敵當往居庸關設險以待拜疏即行不俟朝命既至居庸即倒戈降賊矣

命太監高起潛杜勳等分往天津保定真宣各鎮監軍兵部言各物處力不繼而事權紛拏反使督撫各官有所藉口上不聽命進魏藻德禮部尚書兼工部尚書文淵閣大學士總督漕運屯練往天津方岳貢戶部兼兵部尚書文淵閣大學士總督漕運屯練往濟甯會有言各官不可令出：即潛遁遂止不遣未幾陳演蔣德璟相繼告歸藻德即為首輔當罷演之先一日上語演曰朕不要做的先生偏要做朕不要做的先生偏不要做蓋指言南遷及遣兩輔諸事也

原評時分遣兩輔臣  
上為南遷地也

賊犯大同兵民皆欲降命守城衆不應總兵朱三傑樂自刎巡撫衛景瑗督糧戶部郎中徐有聲巡道朱家仕俱死之文學朱若葵合家九人自縊先題曰一門完節李自成入大同殺代府宗室殆盡留偽將張天琳守之天琳殺僂齒暴後為陽和軍民約鎮城軍民內應殺天琳

賊犯保定督師李建泰已病中軍郭中傑縋城降賊入城建泰被執御史金毓峒守西門賊執之入三皇廟見賊帥毓峒奮拳毆賊帥仆地躍入井中死妻王氏自經從子振孫以武舉効力行間登城射賊多應弦而斃城陷衆解戎衣自匿振孫衣裊褸大呼曰我金御史姪也賊支解之毓峒子婦陳氏年十八與



其祖母張氏母楊氏嫂常氏盡投於井張抱一孫於懷而下侍婢四人亦同下時三月廿一日京城已先三日破矣賊陷陽和遂長驅向宣府、叛將白廣恩貽總兵姜瓖書約降監視太監杜勳緋袍八駟郊迎軍民聚謀籍、巡撫朱之馮獨行巡城見大砲曰汝曹試發之可殺數百人賊雖殺我無恨矣衆又不應之馮不得已乃自起燃火兵民競挽其手之馮乃奪刀自刎死軍民遂迎降鄉紳張羅彥自殺

時京師以西諸郡縣望風瓦解將吏或降或遁賊移檄至京寫十八日至幽州會同館繳京師大震十六日陷昌平州十七日上方御殿召考選諸臣問裕餉安民策對未及半密封入上覽

之色變即起入諸臣立候多時命俱退始知為昌平失守也是夜賊由沙河直犯平則門竟夜焚掠火光燭天十八早朝上召對諸臣而泣俛首書御案十二字以示司禮監王之心即拭去諸臣方侍班襄城伯李國禎匹馬馳闕下汗浹沾衣內臣呵止之國禎曰此何時也君臣即求相見不可多得矣上召入奏守城軍不用命鞭一人起一人復卧如故上乃命內臣俱往守城十九日早大雨止賊攻城礮聲不絕上幸南宮登萬歲山望烽火不絕徘徊踰時回乾清宮硃書諭內閣成國公提督內外諸軍事夾輔東宮時諸閣臣已出內臣置几上而去上入中宮視石縊畢仍回南宮登萬歲山之壽皇齋自縊亭新建閣內操



原評對縊者為王  
承恩

處也。太監王之心對縊。諸文武臣相隨死難者。閣臣范景文而下。凡二十餘人。另有紀。





